

PERAGAM MUSIN LENT 2022

Diocesan Christian Education and Literature Board
Diocese of Kuching

2022

JAKU PEMUKA

Bala menyadi dalam Kristus,

Lebuh kitai enggau chara intensyenal neruska pelajai kitai ngemansangka pengawa ngaga diri empu enggau orang bukai nyadi murid Jesus (intentionally advancing discipleship), aku ngarap sereta besampi ngambika Peragam Musin Lent tu ulih nulung kitai belamatika pemesai reti pengawa Jesus ba kayu regang. Tu pengawa ti dikereja Iya enggau penuh pengerindu ngambika nengah pemerinsa enggau pematI Iya, kitai ulih diselamatka.

Tu mih maya kitai nyeremin diri lalu ngesal ati, minta Allah Taala ti pengasih sereta besai pengerindu, ngampun enggau ngeraika kitai. Awakka musin tu dikena kitai ngemaruhka diri laban ku Allah Taala, "Enti nemiak Aku ngemaruhka diri, besampi ngagai Aku, lalu ngelengkaka jalai sida ke jai, nya baru Aku deka ninga sida ari serega, lalu ngampun dosa sida, sereta ngeraika menua sida." (2 Bansa Israel 7:14)

Aku mega ngarap sereta besampi ngambika Musin Lent tu mai bida ti besai dalam pejalai roh kitai enggau Tuhan. Awakka maya tu ngingatka kitai pasal kitai ti nemiak Allah Taala udah dikanggauka Iya nyadi orang ti ngemeranka pengawa besampi. Awakka Tuhan Allah Taala, nengah Roh Kudus, mai kitai semak agi ngagai Kristus, ngambika Iya nyadi Batu Ti Pemadu Beguna dalam pengidup kitai.

Pemaik enggau pengaga Kristus bisi enggau kitai semua. Amin.


The Rt. Rev. Datuk Danald Jute
The Bishop of Kuching

PENGAJU (ACKNOWLEDGEMENT)

Terima kasih ke bala ti ngarang enggau ti nulung ngechik Peragam Musin Lent tu.

**2 MARCH 2022 (HARI TIGA ABUS)
- GAYA BEPASA TI DIKEDEKAKA ALLAH TAALA -**

BACHA: ISAIAH 58:1-12

*“Baka tu ku gaya bepasa ti dikedekaka Aku: muai rantai ti nekanka pengidup orang, muka tali tangkun ti merinsaka sida, ngelepaska orang ke kena perinsa, lalu matahka semua kungkung; magi pemakai kita enggau orang ke lapar;”
(Isaiah 58:6-7)*

PERAGAM

Pengawa bepasa nya disiplin diri empu dikena meretika pengidup roh ti lebih dalam. Iya ukai semina pengawa ti nagang diri ari makai. Allah Taala dekaka pengawa bepasa ti mai pemanah enggau pengelepas ngagai nemiak Iya ti merinsa ketegat penyeranta tauka kena tindas. Allah Taala kitai ti chukup nelap dekaka nemiak Iya nyadi orang ti nelap sereta bepengerindu, kasihka orang sereta bepengampun baka Iya empu. Lebu kitai meda bisi orang kena tindas, lalu enti kitai enda ibuhka hal nya, kitai nyangkal identiti kitai orang Kristian ti patut nentuka adat menua dipejalaika enggau lurus lalu semua mensia dianggap sama rata. Ketegat penyakit Covid-19 ke benung ngelekai diatu, mensia ukai semina dituntung pemat, tang mega napi penusah ekonomi enggau penatai pemisi ti balat bekurang. Tu bisi ngujungka penanggul baka “depression” enggau hal munuh diri ba sekeda orang ti enda ulih agi natka pemerinsa enggau penusah sida. Taja pen maya diatu kitai patut bejimat ari segi bebelanja, tang kitai mega patut ingat kitai tu nemiak Allah Taala lalu Iya dekaka kitai bekunsika berekat kitai enggau sida ke amat begunaka iya. Tu mih gaya bepasa ti dikedekaka Allah Taala ba kitai.

KEREJA

Kati aku bepasa nitihka peneka Allah Taala, iya nya nyangkal pengingin diri empu ari keresa dunya ngambika aku ulih nulung orang bukai?

SAMPI

Tuhan Allah Taala, tanam dalam ati aku pengingin ti ukai ibuhka penguntung diri tang ke penguntung sida ti suntuk. Tuhan, laban Nuan udah balat ngereja pemadas dalam pengidup aku, saup aku ngereja pemadas ngagai orang bukai. Beri berekat ngagai aku dalam misyen enggau ministri tu, ulih Kristus ti Tuhan enggau Juruselamat aku. Amin.

3 MARCH 2022 – JALAI NUJU PENGIDUP

BACHA: ULANG ADAT 30:15-UJUNG

Ku Moses bejaku, “Sehari tu aku ngasuh kita milih antara pemadas enggau penyai, antara pengidup enggau pematī.” (Ulang Adat 30:15)

PERAGAM

Nitihka atur Penyanggup Lama, Israel tau milih: pengidup tauka pematī. Nya nitihka peneka sida empu. Allah Taala tetap deka dimuliaka nengah orang Israel. Baka ni utai nya tau nyadi sigi nitihka pilih sida. Enti sida ngasi, sida deka meda berekat. Tang enti sida enda ngasi, sida deka dirusak. Utai nya nitihka Israel sereta bepanggai ba ulah sida. Beguna bendar enti kitai nemu, dalam Jesus Kristus kitai enda bekaul enggau Allah Taala ngena atur dalam Penyanggup Lama, tang ngena atur ti lebih manah agi: Penyanggup Baru. Nitihka Penyanggup Baru, kaul kitai enggau Allah Taala bepanggai ukai ba utai ti dikereja kitai, tang ba utai ti dikereja Jesus ngarika kitai. Mayuh utai ti baka tu ba Penyanggup Baru, tang bisi siti pekara ti amat bebida antara dua iti penyanggup tu. Tu bisi disebut ba Hebrew: “Orang ke udah ngelanggar Adat Moses deka diukum bunuh enggau nadai pengasih, beduduk ba saksi dua tauka tiga iku orang. Dalam runding kita, baka ni ku pemalat ukum ti patut ditatka orang ke udah ngelunjuk Anak Allah Taala, ke udah busung ngelaban darah sempekat ti udah dikena nguduska sida, lalu udah ngeleseka Roh Kudus ti meri pengasih?” (Hebrew 10:28-29)

KEREJA

Pilih Jesus ari semua utai bukai laban Iya nya pengidup. (John 14:6)

SAMPI

Allah Taala ti pemadu bekuasa, Apai kami di serega, terima kasih laban udah ngitung kami berega ulih Anak Nuan Jesus Kristus, Tuhan enggau Pengelepas kami. Amin.

4 MARCH 2022 – NAMA PIRING TI PATUT DIENJUK?

BACHA: MASMUR 51:1-18

“Piring aku nya ati ti baruh, O Allah Taala. Nuan enggai nulak ati ti baruh, ati ti nesal.” (Masmur 51:17)

PERAGAM

Ai mata aku selalu nitik tiap kali aku nyanyi lagu “How Great is Our God” ke digaga Chris Tomlin. Aku suah nyanyi lagu nya laban leka iya manah. Tang leka jaku iya nadai mayuh reti ba aku. Nya sebedau aku berubat muai kanser thyroid. Aku diubat ngena iodin ti radioaktif ti dipakai aku dua kali, lalu tiap kali aku berubat aku enda tau semak orang sepengelama tujuh hari beturut. Aku diau ba siti bilik ba rumah apai aku lalu enda tau semak orang, nyengkaum apai-indai aku ti sama rumah enggau aku. Pengidup ti baka nya balat ngenyitka aku, dataika aku ulih ngasaika pematat pengelemi diri enti dibanding enggau pengering Allah Taala. Bala lutur enggau bala nas ulih ngubat enggau meri aku ubat tang semua tu nadai ulih nyamin aku digeraika ari kanser. Aku ngaku semina Apai kitai ti di serega aja ti ulih ngelepaska aku. Semua utai ti diulih aku datai ke diatu nadai guna magang. Semua nya enda ulih nyelamatkan aku. Nya mih maya aku nemu, semina siti aja utai ti amat beguna, iya nya aku meri pengidup aku mela Allah Taala enti Iya meri aku peluang kedua.

KEREJA

Kitai ulih meri mayuh utai nyadi piring ke Allah Taala – duit, keresa, rumah, tanah, enggau utai bukai. Tang Iya enda begunaka piring ke baka tu. Utai ti amat dikedekaka Iya nya kitai – iya nya seluruh pengidup kitai mela Iya. Kitai nadai chara bukai ngereja tu, tang nyadi murid Jesus ti manah sereta taluk, mela Iya enggau ati ti lurus sereta baruh, lalu enda ngarapka diri diberi upah.

SAMPI

Apai ti kudus sereta besai pengerindu, terima kasih laban Nuan udah mechahka ati batu aku lalu udah ngemaruhka aku datai ke pengabis pengelemi aku. Aku ngasaika diri amat diberekat lebu kuasa Nuan digaga menyana dalam pengelemi aku. Awakka Nuan terus meransang aku meri pengidup aku nyadi piring ti idup, kudus sereta ngerinduka ati Nuan. Aku keran deka tama ke dalam pengidup ti bisi Nuan, nyadi nemiak Nuan ti manah sereta taluk, lalu deka nerima semua utai ti disemaya Nuan nengah Anak Nuan Jesus Kristus, Tuhan enggau Allah Taala aku. Amin

5 MARCH 2022 - KATI JALAI TUHAN MEREKATKA KITAI?

BACHA: ISAIAH 58:9B - UJUNG

Lalu TUHAN deka seruran ngiring kita lalu ngemuaska kita enggau utai ti manah, lalu ngasuh kita kering; lalu kita deka nyadi baka kebun ti selalu dipanjang enggau ai, baka mata ai ti nadai nemu langkang. (Isaiah 58:11)

PERAGAM

Dalam baca tu, bepasa nya tema ti ditekanka ba ayat 1-10, tang ayat 11 nyebut pasal berekat Allah Taala ngagai nemiak Iya. Dalam Musin Lent tu, kitai diperansang bepasa laban bepasa tu siti ari disiplin roh ti ngeringka kaul kitai enggau Allah Taala. Bepasa ukai semina nagang diri ari makai tauka ngirup aja, tang bepasa ti bendar ti diterima Allah Taala nya baka ti disebut ba Isaiah 58:6-8. Bepasa ti bendar nya bekungsi enggau orang ti suntuk tauka seranta, mai penampak ngagai orang ti agi diau dalam pemetang, ngelempungka ma pangan diri, lalu rinduka diri sama diri. Nengah chara tu, penampak Kristus deka manchar nengah kitai ngagai serata dunya. Jaku-Dalam 11:25 madahka, “Orang ke meri enggau ati ti gerah mudah, deka nyadi kaya-raja. Orang ke nulung orang bukai, deka bulih tulung ari orang.” Reti nya, Allah Taala deka merkatka kitai lebu kitai merkatka orang bukai ngena utai ti dikemisika kitai.

KEREJA

Maya diatu serata dunya balat ngasaika penanggul pengidup ketegal penyakit Kovid-19. Mayuh orang diketuka ari pengawa ti ngujungka sida lenyau penatai pemisi. Hal tu balat ngenataika pemedis enggau pengirau. Dalam Musin Lent tu kitai ukai semina patut meri terima kasih ngagai Allah Taala ke semua berekat ti udah diberi Iya ke kitai, tang meri bantu nengah utai ti dikemisi kitai ngagai orang ke suntuk enggau seranta.

SAMPI

Apai, kami beterima kasih ke semua berekat ti udah diberi Nuan ke kami. Gaga kami nyadi perengka Nuan mai berekat ngagai orang bukai ngambika penampak Nuan manchar enggau lebih terang nengah kami. Dalam nama Jesus Kristus kami besampi. Amin.

**6 MARCH 2022 (HARI MINGGU KETERUBAH MUSIN LENT)
– CHARA MERI TERIMA KASIH NGAGAI ALLAH TAALA -**

BACHA: ULANG ADAT 26:1-11.

“Nya alai diatu aku mai buah bungas ari utai ti ditanam aku ba tanah ti udah diberi Nuan, O TUHAN, ngagai aku.” (Ulang Adat 26:10)

PERAGAM

Maya Moses kelia, orang Israel balat amat merinsa lebu sida diau ba menua Ejip, ti endur sida dipejal nyadi ulun. Tang Allah Taala ngelepaska sida laban Iya ningaka serabana sida ti minta tulung. Allah Taala mega meri sida menua ti manah enggau tanah ti ami. Nya mih kebuah sida balat beterima kasih ngagai Allah Taala. Kena ngenataika terima kasih ngagai Allah Taala, sida mansang ngagai imam, mai buah bungas, asil ti pemadu manah ngagai TUHAN. Pengidup orang Kristian mega baka pengidup orang Israel. Sebedau kitai ngelala sereta nerima Kristus, kitai agi tesat sereta jauh ari Allah Taala. Maya nya pengidup kitai diulun kuasa penyai enggau kuasa pemetang. Tang Allah Taala ulih pengasih Iya, ngelepaska kitai baka Iya ti ngelepaska orang Israel ari nyadi ulun. Iya nganjung Anak Iya datai ngagai dunya tu laban deka ngiga sereta ngidupka orang ti udah lenyau (Luke 19:10). Ba kayu regang Anak Iya meri Diri mati ketegal kitai lalu udah nebus kitai ari semua penyai, lalu ulih nya Iya ngaga kitai nyadi orang tuchi ti enggi Iya sereta ti ingin deka ngereja utai ti badas (Titus 2:14) ke Iya.

KEREJA

Peratika pemanah Allah Taala ba pengidup nuan. Taja pen nuan enda kaya raja baka orang bukai, tang Iya udah meri nuan pengerai, seput enggau berekat ti bukai. Nya alai kitai enda tau enda meri puji enggau terima kasih ngagai Iya ngena pemi, penemu tauka diri empu ngagai Iya.

SAMPI

Tuhan Allah Taala, buka mih mata aku awakka ulih ngelala berekat Nuan. Buka mih ati aku awakka nemu beterima kasih ke pemanah Nuan. Buka mih pending aku awakka ulih ninga Nuan bejaku dalam ati aku. Buka mih mulut aku awakka enda leju ngangkatka sampi ngagai Nuan. Tegu mih kaki enggau jari aku awakka tau dikena ngereja utai ti manah ke Nuan. Dalam nama Jesus Kristus aku besampi. Amin.

7 MARCH 2022 – ALLAH TAALA DEKAKA KITAI IDUP KUDUS

BACHA: ADAT LEWI 19:1-2, 11-18

“Sebut ngagai semua orang Israel: Kita enda tau enda kudus, laban Aku ti TUHAN Allah Taala kita, kudus.” (Adat Lewi 19:2)

PERAGAM

Petara bansa Israel nya Allah Taala ti kudus. Iya dekaka nemiak Iya, iya nya bansa Israel nyadi bansa ti kudus laban Iya Empu kudus. Pengudus nya ukai semina pengidup ti nitihka atur tauka adat; iya mega ukai semina pengawa ti ngelaungka utai ti ditagang jaku Allah Taala. Pengudus nya kualiti pengidup ti lepas ari tanchang kuasa dosa enggau penginein ti jai. Iya mega pengidup ti alai mensia enggau penuh pengaga ngereja peneka Allah Taala lalu nitihka gaya pengidup Iya. Allah Taala nya “standard” pengudus ti patut ditihka mensia dalam pengidup. Iya udah ngayanka pengudus nya nengah pengidup Anak Iya Jesus Kristus ti chukup menyana sereta nadai penimpang. Ketegal nya, kitai ti nemiak Iya patut ngemeranka pengidup ti kudus. Lebu bansa Israel ngasika adat Allah Taala pasal moral enggau pengelurus bejalaika adat menua, sida iya ngemeranka pengidup ti kudus, lalu ulih nya sida nitih lalu ngembuan gaya pengidup Allah Taala. Baka nya mega orang Kristian, lebu kitai idup kudus kitai ngemeranka gaya pengidup Allah Taala. Tu mih identiti ti dikedekaka Allah Taala ba kitai lebu Iya bejaku munyi tu, “Kita enda tau enda kudus, laban Aku ti TUHAN Allah Taala kita, kudus.”

KEREJA

Ngemeranka pengidup ti kudus nya ukai semina tanggung pengawa kitai, iya mega identiti ti patut diulihka tiap iku orang ti dikerinduka Allah Taala.

SAMPI

TUHAN, tulung aku ngemeranka pengidup ti kudus nitihka teladan Anak Nuan Jesus Kristus ti udah mai mulia ngagai nama Nuan nengah pengidup Iya ti menyana sereta kudus. Dalam nama Iya aku besampi. Amin.

8 MARCH 2022 – KUASA JAKU ALLAH TAALA

BACHA: ISAIAH 55:10–11

Baka nya mih jaku ti pansut ari mulut Aku. Iya tetap deka mujur ngereja utai ti udah diperambu Aku ke iya. Iya deka ngereja utai ti diasuh Aku kereja iya. (Isaiah 55:11)

PERAGAM

Jaku Allah Taala endang mansutka buah. Jaku nya selalu ngamatka tuju asal Iya di dunya. Jaku Allah Taala bisi kuasa, lalu endang enda kala rumbau tang nitihka tuju ti dikedekaka Iya (Isaiah 55:11). Lebu may nemiak Allah Taala nging ngagai Iya lalu ningaka Iya, Jaku Iya ngereja pengawa Iya ke nebus dosa dalam sida, mai pengaga enggau pemaik ti ngingungka utai ti besai nyadi. Pengaga nya amat besai, indah bukit enggau tinting, pia mega kayu ba babas sama-sama gagit. Menua puang, ke ditemu kitai sebedau tu ngingatka kitai pasal sumpah (duri), diatu deka tumbuh kayu ti manah enggau beguna. Endang dipeda enggau amat terang; dalam pengawa Iya ti bemulia ngatur baru semua utai, Allah Taala muai semua pemuang enggau sumpah ti ninggang sida, lalu mai pemanah enggau mansutka buah. Lebu may Allah Taala ngaduka utai baru, semua pengawa nya dikereja ke nama Iya enggau ke mulia Iya. Lebu Tuhan ngaduka utai baru, pengawa nya likun; tu tanda ti meruan ti enda ulih dipadamka. Asil iya, Allah Taala deka meri kitai pengaga ti nadai pengujung.

KEREJA

Isaiah 55:11 besai amat guna kena ngerak orang Kristian ngambika kitai ngemetulka pengidup kitai ti bedosa lalu arap ke Allah Taala, laban nadai nama bukai di baruh langit ti diberi ngagai mensia ti ulih nyelamatkan mensia. Ingat – Allah Taala udah mandangka Diri enggau pesan Iya nya tinggi ari semua utai (Masmur 138:2) lalu semua ti ditulis dalam Bup Kudus endang deka dikeamatkan.

SAMPI

Apai ti di serega, terima kasih ke Jaku Nuan. Terima kasih laban semua ti ditulis dalam Bup Kudus enda pulai puang ngagai Nuan, tang deka dikeamatkan nitihka peneka Nuan. Terima kasih ke pelan penyelamat Nuan lalu kami semina bepanggai ba Tuhan Jesus ke pengampun dosa enggau ke pengidup meruan. Aku minta semua tu dalam nama Jesus lalu ketegal nama Iya, Amin.

9 MARCH 2022 – ALLAH TAALA MEDA UTAI TI DIKEREJA SIDA

BACHA: JONAH 3:1-UJUNG

Allah Taala meda utai ti dikereja sida. Iya meda sida udah ngelengkaka ulah sida ke jai. Nya alai Iya ngubah runding Diri, lalu enda nyadi ngukum sida. (Jonah 3:10)

PERAGAM

Orang ti diau di negeri besai Nineweh udah balat bedosa ngelaban Allah Taala, lalu Iya ngasuh Jonah mansang ngagai sida lalu ngajar sida ngambika sida ngesal ati. Mula Iya Jonah enggai pegi laban Iya nemu Allah Taala deka ngampun sida lalu merekatka sida enti sida ngesal ati ke dosa sida lalu nyembah Allah Taala. Taja Jonah nemu diri ukai orang ti pandai ngenataika jaku ajar, tang Iya nemu pemisa Jaku Allah Taala ti alai orang di Nineweh deka nerima pesan Allah Taala lalu deka dilepaska ari ukum Iya. Pengujung Iya, Jonah mansang ke Nineweh lalu ngenataika pesan Allah Taala ngagai sida. Sida arapka utai ke disebut Iya lalu ngesal ati. "Allah Taala meda utai ti dikereja sida. Iya meda sida udah ngelengkaka ulah sida ke jai. Nya alai Iya ngubah runding Diri, lalu enda nyadi ngukum sida". Tu mega pesan ti sama enggau pesan ti dibai Kristus lebu Iya datai nyadi mensia ngambika Iya ulih muai dosa kitai lalu meri kitai pengidup ti meruan. Semua kitai sebaka enggau orang di Nineweh. Semua kitai udah bedosa magang lalu jauh ngejang ari mulia Allah Taala. Tang Allah Taala nya pengasih lalu nengah pematI Anak Iya Yesus Kristus, Iya ngangauka tiap iku kitai ngambika kitai ngesal ati ke dosa kitai lalu Iya deka merekatka kitai sereta nerima kitai nyadi anak ti amat dikerinduka Iya.

KEREJA

Pansik pengidup nuan lalu peratika nama utai dalam pengidup nuan ti bedau diserahka nuan enggau pengesal ati ngagai Allah Taala.

SAMPI

Apai ti di serega, terima kasih laban Nuan udah ngirumka Anak Nuan datai ke dunya ngambika Iya muai dosa aku lalu meri aku pengidup ti meruan. Apai, aku ngaku semua dosa aku ba Nuan (sebut dalam ati dosa nya), sekaligus dosa ti ditemu aku tauka ti enda ditemu aku, nyengkaum dosa ti dikingat enggau ti enda dikingatka aku. Tuchi beresi aku Apai ngena darah Anak Domba Nuan ngambika aku ngerinduka ati Nuan lalu pengidup aku ulih diterima Nuan. Dalam nama Yesus aku besampi. Amin.

10 MARCH 2022 – KUINGKA DIRI NGAGAI TUHAN

BACHA: ISAIAH 55:6-9

Kuingka diri ngagai TUHAN, lalu besampi ngagai Iya, laban Iya diatu nyau semak. (Isaiah 55:6)

PERAGAM

Kitai patut ngeyemakka diri enggau Allah Taala, kelebih agi maya diatu lebu kitai kena tuntung penusah virus Kovid-19 ke udah balat ngelekai serata dunya ti ngujujngka mayuh orang bebadi nyawa. Nadai siti menua di dunya ulih nyelialhka penyakit tu, ti alai Iya enda disangka udah ngubah pengidup kitai ari baka ke ngelamatu. Nya alai lebu ti dituntung penusah bakatu, Allah Taala sekali agi ngingatka kitai, ngasuh kitai kuingka diri lalu besampi ngagai Iya, awakka ninting hari kitai ulih napi serang virus Kovid-19 tu. Nadai chara bukai kena kitai ngelaban penyakit tu, kelimpah ari pengering dalam Kristus. Allah Taala ti pemadu bekuasa, ti ngaga serega enggau bumi, ke udah ngayanka Diri nengah Anak Iya Jesus Kristus, ngasuh kitai besemak enggau Iya, nging ngagai Iya, besampi ngagai Iya, ngiga Iya laban semina Iya aja ti ulih meri utai ti dipegna kitai, nitihka pengaya mulia Iya dalam Jesus Kristus. Enti kitai enda nging ngagai Iya, enda besampi ngagai Iya lebu Iya agi semak, kitai nadai bulih peluang deka ngelala sapa Petara ti disembah kitai lalu kitai mega nadai bulih berekat ti udah disemaya Iya.

KEREJA

Kuingka diri ngagai TUHAN lalu besampi ngagai Iya seharitu, anang betanggung agi. TUHAN ngangauka kitai awakka kitai lebih agi besemak enggau Iya. Suah agi kitai ngiga Iya, suah agi kitai tetemuka Iya. Suah agi kitai tetemuka Iya, dalam agi pengerindu kitai ke Iya.

SAMPI

Tuhan, ubah mih chara aku berunding awakka aku enda nitihka chara dunya tang nitihka peneka Nuan dalam pengidup aku. Dalam nama Jesus aku besampi. Amin.

11 MARCH 2022 - KATI KITAI NGUMBAI ALLAH TAALA NGEREJA UTAI NGENA JALAI TI SALAH?

BACHA: EZEKIEL 18:21-28

“Tang ku nuan, ‘Utai ti dikereja TUHAN nya salah.’ Pendingka Aku, kita orang Israel. Kati kita ngumbai Aku ngereja utai ngena jalai ti salah? Jalai kita ke salah.” (Ezekiel 18:25)

PERAGAM

Lebuh utai ke jai nyadi dalam pengidup kitai, selalu iya kitai ngelempaika penyalah nya ba orang bukai. Kitai jampat nuduhka orang bukai, lalu kadang-kadang nuduhka Allah Taala. Kitai besalahka Allah Taala lebu kitai enda teulihka utai ti dikedekaka kitai. Kitai besalah Allah Taala lebuh penyai bekuasa atas pemadas. Kitai besalahka Allah Taala lebuh pengingin sereta juluk ati kitai enda nyadi nitihka peneka kitai. Baka tu mih kitai mensia, kitai suah enda ingat ka status diri empu ti bedosa sereta suah ngereja penyalah. Enti enda ketegal pengawa Kristus ba kayu regang, kitai deka nuju pemat ti belama iya ketegal dosa. Tang Allah Taala endang lurus sereta kudus lalu deka ke kitai ngesal ati. Ku Jesus, “Enti orang deka nitihka Aku, awakka iya badu agi berundingka diri empu, ngesan regang iya, lalu nitihka Aku. Laban barang sapa deka ngidupka nyawa diri, deka ngelenyauka iya, lalu barang sapa ngelenyauka nyawa diri ketegal Aku, deka tetemuka iya” (Matthew 16:24-25). Lebu kitai ngesal ati, ngesan regang diri lalu enda nitihka pengidup lama ti bedosa, kitai deka lurus ba mata Allah Taala.

KEREJA

Belematika semua runding kitai ti salah pasal pengelurus Allah Taala. Udah nya besampi minta pengampun ari Iya sereta minta pengering dikena nuan ngesan regang ninting hari.

SAMPI

Apai ti di serega, kami suah sereta jampat nuduh sereta besalahka Nuan lebu utai enda nyadi nitihka peneka kami. Ampun kami Apai ke semua penyalah ti udah dikereja kami ti enda ngerinduka ati Nuan. Kami besampi awakka Nuan meruan meri kami pengering dikena kami ngesan regang diri ninting hari nuduka peneka Nuan. Dalam nama Jesus aku besampi. Amin.

12 MARCH 2022 – NGAKU NYADI NEMBIAK ALLAH TAALA

BACHA: ULANG ADAT 26:16-UJUNG

“Sehari tu kita udah ngaku TUHAN nyadika Allah Taala kita. Kita udah besemaya deka ngasika Iya, nitihka semua adat Iya, lalu ngereja semua utai ti dipesanka Iya ngagai kita.” (Ulang Adat 26:17)

PERAGAM

Siapa kitai, nya nentuka ulah kitai. Anak raja enda sebaka ulah enggau orang ke biasa, lalu pemakai orang ti enggau pekit belanda enda sebaka enggau orang ti enggau pekit bebatak tali. Siapa sida nya nentuka ulah pengidup sida. Pengidup kitai orang Kristian pen bakanya. Siapa kitai nya enda ditentukan ari batang pengawa ti dikereja kitai, tang ditentukan ari mata Allah Taala: kitai nya nemiak Allah Taala. Ba bacha di atas, Moses madahka bala orang Israel kelia nya enggi Allah Taala. Lalu ketegal nya, sida patut ngasika Iya, nitihka adat Iya, sereta ngereja semua pesan Iya. Sida ti udah diselamatkan ari nyadi ulun di menua Ejipt, diatu udah diempu Allah Taala ti nyelamatkan sida. Pia mega kitai orang Kristian; kitai udah diselamatkan Allah Taala ari ukum dosa enggau pematitengah Anak Iya Yesus Kristus ti mati ngarika kitai, lalu diatu kitai udah diempu Allah Taala. Ketegal nya, kitai patut ngasika Iya, nitihka adat Iya, sereta ngereja semua pesan Iya. Nya mih identiti kitai: kitai nemiak Allah Taala.

KEREJA

Perundingka enti bisi utai ti agi dikembuan sereta dikereja nuan ti enda nitihka pesan Allah Taala, lalu ngesal ati ke dosa nuan. Pinta Roh Kudus ngiring nuan dalam jalai pengelurus.

SAMPI

Apai, kami besampi awakka Nuan semampai ngingatka kami nya nemiak Nuan. Iring kami dalam jalai pengelurus Nuan, lalu saup kami taluk sereta ngasika Nuan laban Nuan ti udah nyelamatkan kami ari kuasa dosa enggau pematitengah. Dalam nama Yesus. Amin.

13 MARCH 2022 (HARI MINGGU KEDUA MUSIN LENT)
- ARAPKA ALLAH TAALA -

BACHA: PEMUNGKAL 15:1-12, 17-18

Abram arapka TUHAN, lalu ketegal nya TUHAN ngumbai iya lurus. (Pemungkal 15:6)

PERAGAM

Bisi siku apai tuai orang ke rabun malam, angkat enda madahka sida sabilik lalu bejalai nuju kebun getah sida ke umbas penyauh. Terunda ba kebun getah nya, alai hari lalu lemai. Iya enda tepedaka jalai pulai agi. Meda iya nadai pulai, sida sebilik lalu megau orang mai begigaka iya. Sida ngiga iya enggau kangau, panjung enggau pangkung tawak. Tang iya nadai engkeretik. Meda bakanya sida ngira iya udah mati. Kejang sida deka mulaika diri, siku ari pangan rapat orang tuai nya lalu nyapa, "O Engkaul." Tu perembian (emperian, kangau tundi) seduai iya enggau pangan diri. Orang tuai nya tadi lalu nyaut ari petang tegayam. Sida lalu tetemuka iya. Kebuah orang tuai nya enggai nyaut orang ke ngiga iya, ngangauka nama bendar iya, laban iya agi ngemeranka pengarap lama, takutka bala antu nyaru diri nyadi mensia malam hari. Iya semina nyaut kangau pangan rapat iya ke ngena nama tundi seduai. Iya belabaka sida antu enda ulih niru tauka nemu iya bisi nama siti nya. Agi mega iya ngelala kangau pangan iya lalu arapka iya. Abraham mega baka nya; iya ngelala Allah Taala lalu arapka iya. Lebu Allah Taala ngangauka iya, iya arap lalu angkat ninggalka menua asal iya. Udah iya ngaku pengarap diri ba semaya Allah Taala, iya dikumbai Allah Taala lurus. Pengidup Abraham tu tau nyadi peransang ke kitai ngambika kitai mega arapka Allah Taala.

KEREJA

Baka ni gaya pengidup nuan? Nama chura pengidup ti patut dikemeranka nuan ngambika iya ulih narit orang bukai arapka Jesus Kristus?

SAMPI

Apai kami ti di serega, baka Abraham ke dikira lurus ketegal pengarap iya ba semaya Nuan, bakanya mega kami tau dikira lurus, ulih pengarap kami ba Jesus Kristus. Saup aku mansang sebaka enggau Jesus lalu ulih narit orang bukai ngagai pengasih Iya. Dalam nama Jesus aku besampi. Amin.

14 MARCH 2022 - ALLAH TAALA TETAP ATI KE SEMPEKAT IYA

BACHA: DANIEL 9.4-10

Ku aku, "TUHAN Allah Taala, Nuan endang besai, lalu kami nangika Nuan. Nuan endang tetap ati ngagai sempekat Nuan, lalu ngayanka pengerindu ti meruan ngagai orang ke rinduka Nuan sereta ngereja utai ti diasuh Nuan."
(Daniel 9.4b)

PERAGAM:

Daniel besampi enggau ati ti baruh, ngaku dosa sereta nangika TUHAN Allah Taala lalu ngemuliaka Pemesai kuasa TUHAN Allah Taala ke penetap ati Iya ke sempekat ti udah digaga Iya. TUHAN Allah Taala endang deka ngamatka semaya Iya taja kitai suah bendar ngelaban utai ti diasuh Iya. Ku Ulang Adat 7.9, "Ingat: TUHAN Allah Taala kita endang siku aja. Ati Iya endang tetap. Iya deka ngingatka sempekat Iya, lalu ngayanka pengerindu Iya ti meruan belama iya..." Kitai patut ngemeranka ati ti deka besampi ngingatka sempekat TUHAN Allah Taala, enda ngira dini endur tauka maya kitai besampi, lalu ngesalka pengawa ti ngasuh kitai beserara enggau TUHAN. Kembuanka ati kitai ba pengasih Allah Taala lalu ngasika pesan Iya nyadika tungkat enggau lalau pengidup kitai nuju sempekat Iya. TUHAN Allah Taala deka ngempung Iya empu enggau kitai nengah pengerindu Iya lebu kitai ngasika adat enggau peneka Iya. Ku Kolosi 3.14, "Lebih ari semua, rasukka pengerindu kena ngempung semua utai nyadi siti." Lebu kitai bisi pengerindu lalu ngasika peneka TUHAN, Iya deka nyadi TUHAN Allah Taala kitai lalu kitai nyadi nemiak Iya. Belematika TUHAN Allah Taala ti siku aja, Iya ti ngingkatka sempekat Iya lalu kitai deka bulih mayuh berekat ti diberi Iya.

KEREJA:

Kemeranka pengawa besampi dalam ruang bilik nuan sereta enggau bala pangan ti semak nuan. Seruan ingatka TUHAN Allah Taala ti endang siku aja, ti penuh pengerindu sereta besai pengasih dalam pengidup kitai.

SAMPI:

Allah Taala ti endang meruan, tambahka pengarap ti diberi Nuan ke kami ngambika lebu kami ngelengka utai ti lama lalu nguji ngulihka utai ti deka datai, kami tau bejalai nengah jalai pesan Nuan lalu bulih pengelantang ti endang meruan, ulih Jesus Kristus Anak Nuan Tuhan kami. Amin.

15 MARCH 2022 – ALLAH TAALA BISI ENGGAU KITAI

BACHA: 2 SAMUEL 7:4-16

Aku udah enggau nuan di sebarang endur nuan bejalai, lalu Aku udah ngalahka semua munsuh nuan, lebu nuan majakka pejalai nuan. Aku deka ngasuh nuan beberita baka bala tuai ti pemadu bekuasa di dunya tu. (2 Samuel 7:9)

PERAGAM

Allah Taala beseruan ngagai Raja David nengah nabi Natan madahka ukai Raja David, tang anak lelaki iya ti deka nganti iya nyadi raja, ti deka diasuh Allah Taala ngaga rumah sembiang endur nyimpan Peti Lampang Batu Adat Allah Taala. Rumah sembiang tu besai reti laban nya nandaka Allah Taala bisi enggau bansa Israel lalu sida bisi kaul enggau Iya. Kemayaharitu kitai nirika rumah gerija ngambika kitai bisi endur besembiang lalu ngasaika Allah Taala enda jauh ari kitai. Kelimpah ari rumah gerija, Allah Taala mega dekaka orang Kristian nyadi rumah sembiang endur Iya ulih bekuasa sereta merintah pengidup kitai ngena kuasa Jaku enggau Roh Iya. Nya alai, kitai mesti ngembuan ati ti ngasi, nangi enggau taluk ngambika ulih pengidup kitai ti tuchi, mulia Allah Taala deka terang manchar nengah kitai ngagai orang ti ngiga Iya. Allah Taala ukai semina deka meda luar rumah sembiang nya aja tuchi, tang Iya mega dekaka ati enggau runding kitai tuchi. Ketegal nya, kitai begunaka saup ari kuasa Allah Taala laban kitai enda ulih ngaga diri tuchi nitihka pengingin enggau pengering kitai. Asil iya, ati enggau runding kitai deka sebaka enggau enggi Kristus ti Juruselamat kitai, lalu ulih nya kitai deka seruran ngasaika kuasa Allah Taala enggau nerima berekat ari Iya.

KEREJA

Perundingka baka ni jalai pengidup nuan tau nyadi rumah sembiang ti ngerinduka ati Tuhan. Baka ni pendiau pengidup nuan ti mandangka nuan nya tuchi beresi ba mata Iya?

SAMPI

Tuhan Allah Taala, kami minta Nuan nyaup kami nyadi rumah sembiang Nuan ti tuchi beresi ba mata Nuan. Nya alai, kami besedia ngemendarka Nuan bekuasa sereta merintah pengidup kami nitihka peneka Nuan ti kudus ngambika kami seruran ngasaika Nuan nya bisi enggau kami ba sebarang endur enggau ba sebarang maya. Kami nyerahka sampi tu di dalam nama Jesus Kristus ti Penebus kami. Amin.

16 MARCH 2022 – ORANG MAYUH NULAK ALLAH TAALA

BACHA: JEREMIAH 18: 13-20

“Tang bala nemiak Aku enda agi ingatka Aku. Sida nunu menyan ke engkeramba. Sida udah tesangkut ba jalai ti ditengah sida. Sida enda agi niti jalai ti lama. Sida bejalai nengah jalai ti nadai meruan arus.” (Jeremiah 18:15)

PERAGAM

Nabi Jeremiah nya siku nemiak Allah Taala ti balat napi pemedis lebu iya bejalai ministri iya. Kebuah pia laban orang mayuh ngenggaika pesan ti dikenataika iya ari Allah Taala. Reti nya sida ukai semina nulak Jeremiah, tang sida mega nulak Allah Taala. Jeremiah ngereja pengawa iya nitihka kanggau Allah Taala. Tu mih kebuah iya enda dikerinduka orang ke megai perintah maya nya. Jeremiah suah ngelalau sida pasal Allah Taala ti deka ngenataika penusah ba sida enti sida enda ngasi tauka ngenggaika Allah Taala. Tang bala mayuh enda beduli, sida majakka ulah sida ti salah di mata Allah Taala lalu enda ngesalka dosa sida. Sida bepekat deka ngelaban enggau bedawa Jeremiah. Sida sanggup ngiga penemu-dalam ari orang bukai laban sida enda besetuju enggau jaku Allah Taala ti dikenataika Iya nengah Jeremiah. Taja baka nya, Jeremiah enda mantul dalam ministri iya tang terus ngasika Allah Taala taja orang mayuh ngenggaika pesan ti dibai iya.

KEREJA

Perundingka penanggul enggau pemedis ti ditapi gerija dalam ministri mela Allah Taala. Serahka serabana nuan ngagai Allah Taala laban Iya tetap ati lalu ulih endur bepanggai maya nempuh semua penanggul nya.

SAMPI

Apai, Nuan chukup mereti tentang semua penanggul ti ditempuh gereja Nuan enggau bala pemela Nuan, kelebihan agi dalam sida ke gawaka Nuan. Beri sida pengering ngambika sida ngemeranka pengidup ti bepelasarka pemendar Nuan sereta teguh dalam Nuan taja pen orang mayuh nulak sida ketegal Nuan. Dalam nama Jesus aku besampi. Amin.

17 MARCH 2022 - “AKU DEKA MEREKATKA ORANG TI ARAPKA AKU”.

BACHA: JEREMIAH 17:5–10

*“Tang Aku deka merekatka orang ke manggaika pengarap sida ba Aku.”
(Jeremiah 17: 7)*

PERAGAM

Nabi Jeremiah ngenataika jaku ari Allah Taala ngagai orang Judah dikena iya meri sida pengadang sepengudah menua Babylon alah. Semua tu deka dikeamatka enti sida meruan ngasi sereta talukka sempekat ti udah digaga sida enggau Tuhan Allah Taala. Baka nya mega jaku Allah Taala ba orang ti bisi Kristus; jaku nya deka meruan lalu dikeamatka ba sida. Reti nya, enti kitai manggaika pengarap kitai ba Allah Taala lalu nanam pengadang kitai ba Iya, kitai deka ngembuan pengidup ti bebuah lebat. Tang enti kitai nitihka jaku bukai sereta bekaul enggau orang ti ngelaban peneka Allah Taala, pengidup kitai deka limping sereta bulih pengerusak. Nabi Jeremiah madahka, enti kitai talukka sempekat enggau Allah Taala, taja pen kitai dalam penusah, kitai deka ngembuan pengidup ti tegap baka pun kayu ti ditanka urat ti tegap ba tebing sungai. Ayat 8 madahka, “Orang nya baka kayu ti tumbuh ba tebing sungai lalu nyerangkapka urat iya ngagai sungai. Iya enda takutka musin kemarau, lalu daun iya mengkang gadung. Iya enda irauka hari ti nadai ujan lalu iya majak bebuah.” Tu mih reti kitai arap sereta bepanggai ba Allah Taala, iya nya kitai ngembuan pengadang ba Iya ti deka ngamatka sempekat Iya enggau kitai.

KEREJA

Aram kitai sama nitihka ajar tu, ngaga iya nyadi peransang dikena kitai ngintu Musin Lent tu. Awakka iya mai penerang ke kitai pasal reti pengidup enggau tuju pengarap kitai. Kitai mega ngena ajar tu mai pengesal ati sereta ngulihka pengidup ti berubah lalu ngasika Allah Taala.

SAMPI

Tuhan Jesus Kristus ti Allah Taala kami; ulih pengasih Nuan kelemika ati enggau runding kami ngambika kami semampai ngasi, nunduk sereta talukka sempekat ti udah digaga kami enggau Nuan; ngambika kami tau bulih berekat ti disemaya Nuan, ulih Jesus Kristus Tuhan Kami. Amin

18 MARCH 2022 – JOSEP NYAUT “AU”

BACHA: PEMUNGKAL 37: 3-4, 12 -13, 17-28

Jakop bejaku enggau Josep, “Aku ngasuh nuan mupuk ngagai bala menyadi nuan ke ngibun raban bedus di Sekem.” Disaut Josep, “Au.” (Pemungkal 37:13)

PERAGAM

Josep, nya anak ti pemađu dikesayau sereta dikerinduka Jakob. Lebuđu bala menyadi iya ke bukai gawa ngibun bedus di luar, iya semina diau di rumah. Tang ati iya endang keran deka pansut ari rumah. Nya alai, lebuđu apai iya ngasuh iya ngabas bala menyadi iya ti benung ngemataka jelu ba padang rumput, iya lalu terus nyaut, “au.” Iya ngira diri besedia mupuk ari rumah tang utai ti enda ditemu enggau disadang iya nya pemansut iya ari rumah deka ngujungka iya enda pulai agi, lalu dijual nyadi ulun di menua Ejiđ, lalu ngubah sejarah bansa Israel. Lebuđu aku nulis tu, aku benung nyendiaka diri deka mupuk ke Cairo, Ejiđ. Kena 24 haribulan Mei, 2021, dua hari sebedau aku ngetu gawa ke diosis, aku bisi berandau enggau Bishop Danald pasal perambu aku udah aku penchen. Uđah nya iya nanya aku sekaligus aku besedia dianjung ke Algeria lalu nampung ministri aku dia. Aku madah, “au.” Taja kitai madahka diri besedia, enda semesti iya kitai amat besedia. Kebuah pia, laban mayuh utai ti enda disadang kitai tau nyadi lalu nyekat sebarang utai ti udah diperambuka kitai. Josep diasuh apai iya ngabas bala menyadi iya ti benung ngintu bedus di Sekem, lalu udah nya nusui ngagai apai iya pasal pengawa sida. Tang utai nya enda nyadi baka nya. Josep dijual bala menyadi iya ngagai saudagar ari Midia, dibai ngagai menua Ejiđ, lalu dibeli Potipar nyadika ulun iya. Pengujung iya, Allah Taala ngasuh Josep nyadi orang ti besai pangkat sereta beguna di menua Ejiđ.

KEREJA

Perundingka utai ti amat nyadi dalam pengidup nuan ti endur peneka nuan enda diberi Allah Taala ke nuan. Nama saut nuan ngagai Allah Taala?

SAMPI

Tuhan Allah, berika aku runding ti ulih nyagam peneka Nuan, ati ti ngasika jaku Nuan sereta besedia ngereja pengawa Nuan, awakka semua utai ti digaga aku endang utai ti diasuh Nuan ti pulaika basa enggau mulia Nuan. Amin.

19 MARCH 2022 - PENGASIH ALLAH TAALA

BACHA: MIKAH 7:14-15, 18-20

Nuan deka kasihka kami baru. Nuan deka ngelunjak dosa kami, lalu muai dosa kami ngagai buntut tasik! (Mikah 7:19)

PERAGAM

Allah Taala kitai nya Petara ti pengampun enggau pengasih. Taja kitai mensia bedosa, enti kitai ngesal ati lalu manggaika pengidup kitai ba Iya, Iya deka muai dosa kitai ke "buntut tasik". Rasul Paul bisi nyebut ba 2 Korint 5:21, "Ketegal kitai mih Allah Taala udah ngengkahka dosa kitai ba Iya (Jesus) ke enda bedosa, ngambika dalam Iya kitai digaga lurus di mua Allah Taala." Ukai semina nya aja: Allah Taala kitai balat rinduka dunya, nya alai Iya meri Anak Tunggal Iya, ngambika genap iku orang ke arapka Iya enda mati tang bulih pengidup ti meruan (John 3:16). Penatai Tuhan Jesus Kristus ke dunya tu ukai semina meri kitai jaku ajar tang nyadi genselan sekali aja di kayu regang dikena muai sereta ngampun dosa kitai. Ulih pengasih Iya, Allah Taala udah ngeletak jalai regang nya nyadi siti aja jalai dikena Iya muai dosa kitai ngambika kitai ulih begulai enggau Iya dalam pengidup ti meruan. Reti nya, dalam Jesus Kristus, diatu kitai nadai agi ditinggang ukum (Rome 8:1) tang udah dilepaska ulih pengasih Allah Taala ti chukup besai.

KEREJA

Maya Musin Lent tu kitai beperagamka penaluk enggau pengasih Allah Taala ti udah nyingkirka setan enggau ukum dosa ari pengidup kitai. Tu maya kitai patut balat agi berandau enggau Allah Taala dalam sampi, minta tulung Iya ngelepaska kitai ari genggam dosa ti agi nyengat pengidup kitai.

SAMPI

Apai, terima kasih ke Nuan ti udah ngampun dosa aku sereta udah meresi aku ari pengidup ti nadai ngembuan pemendar Nuan. Penuhka mih aku enggau kuasa Roh Kudus Nuan ngambika aku ulih bejalai dalam pemendar enggau pengasih Nuan. Semua tu dipinta aku dalam nama Tuhan Jesus Kristus. Amin.

**20 MARCH 2022 (HARI MINGGU KETIGA MUSIN LENT)
- NAMA KEBUAH BEBELIKA UTAI TI ENDA NGEMUASKA KITAI? -**

BACHA: ISAIAH 55:1-9

Nama kebuah bebelika utai ti enda ngasuh kita kenyang? Nama kebuah ngena duit ari gaji kita, tang agi lapar? (Isaiah 55:2)

PERAGAM

Tiap iku kitai endang bisi hak ngena duit kitai meli utai ti dikerinduka kitai, ti tau ngemuaska ati kitai. Tang suah iya lebu kitai nyau datai di pasar, lalu tepedaka mayuh macham utai ti dijual, kitai nyau enda ingat tauka tebelika utai ti patut dibeli tauka diguna kitai. Pengujung iya kitai nadai teulihka utai ti dikingin tauka ngemuaska kitai. Hal tu disebut nabi Isaiah munyi tu, “Nama kebuah bebelika utai ti enda ngasuh kita kenyang? Nama kebuah ngena duit ari gaji kita, tang agi lapar?” Nabi Isaiah ngingatka kitai utai ti amat berega ba pengidup kitai, iya ke tau diempu kitai enggau enda bebayar. Kitai tau bulih pengidup ti meruan enggau penuh berekat lebu kitai ninggalka pengidup ti jai tauka enda besenutuk enggau Allah Taala lalu nging sereta ngenyemakka diri ngagai Allah Taala. Maya penusah ketegal pengelekai penyakit Covid-19 ti nuntung dunya ke diatu, kitai ulih besagamka nama bagi utai ti semina sementara aja lalu nama utai ti deka meruan belama iya. Lebu kitai meda penusah pemat ti nyadi ngelingi kitai, enda milih umur tauka darjat, kitai sedarka pemandak umur kitai mensia, lalu ba pengujung iya serepik kain pen nadai ulih bai kitai meraka ngagai dunya pemat. Semina iya ti tinggal iya nya pengingat orang pasal pemanah enggau penyiru kitai.

KEREJA

Maya Musin Lent tu, aram mih kitai sama-sama besagamka nama utai ti ulih meri pengelantang ti meruan belama iya ngagai kitai. Jalai nuju pengidup ti meruan semina ditemu kitai lebu kitai nitihka tapak kaki Tuhan Yesus lalu ngasika pesan Iya.

SAMPI

Allah Taala Apai kami ti di serega, saup kami nyidi peneka Nuan dalam pengidup kami lalu beri ke kami pengering ngasika pesan Nuan. Kami minta semua utai tu dalam nama Yesus Kristus, Tuhan enggau Penebus kami. Amin.

21 MARCH 2022 – TANDA PENATAI IMANUEL

BACHA: ISAIAH 7:10-14

“Tuhan Empu deka meri kita siti tanda: siku indu dara deka ngandung lalu ngadaka anak lelaki siku, lalu Iya deka meri anak mit nya nama ‘Imanuel’.”
(Isaiah 7:14)

PERAGAM

Nabi Isaiah anak Amos begelar “the evangelical prophet” laban iya mayuh benabi pasal penatai Kristus enggau pengawa Iya ti nyelamatkan mensia, dibandingka enggau bup-bup bukai dalam Bup Penyanggup Lama. Bup Nabi Isaiah ngundan runding ati Allah Taala pasal “Bala anak ke diibun Aku, udah angkat ngelaban Aku....nembiah Aku orang Israel enda nemu sapa tuan sida...” (Isaiah 1:2-3). Sida udah nulak, udah ngingka belakang sida ari Iya. Allah Taala besemaya deka ngukum sida ketegal pengawa nya. Tang nengah Nabi Isaiah mega Allah Taala besemaya deka nyelamatkan mensia munyi tu, “Tuhan Empu deka meri kita siti tanda: siku indu dara deka ngandung lalu ngadaka anak lelaki siku, lalu Iya deka meri anak mit nya nama ‘Imanuel’” (reti nya, “Allah Taala enggau kitai” - Matthew 1:23). Semaya tu dikamatkan Allah Taala lebu Maria ngadaka Jesus di Betlehem rambau pemerintah Raja Besai Agustus. Pengada tu nandaka Allah Taala empu udah datai nyelamatkan kitai mensia nengah pematu Tuhan Jesus ba kayu regang.

KEREJA

Uji kitai mikir, nama penyadi kitai enti Allah Taala nadai ngirumka Anak Iya Jesus Kristus matika kitai di atas kayu regang? Musin Lent tu kitai patut belematika pengerindu Allah Taala ti udah ngirumka Anak Iya ngambika nanggung dosa kitai ba atas kayu regang.

SAMPI

Terima kasih Apai laban Nuan udah ngirumka Imanuel nyadika Juruselamat aku. Saup aku Apai ngambika aku nyadi anak Nuan ti ngasi sereta ngemeranka pengidup ti sebaka enggau pengidup Jesus Kristus ti Tuhan aku. Amin.

22 MARCH 2022 – IYA MANDANGKA UTAI TI DALAM.

BACHA: DANIEL 2:20-23

Iya mandangka utai ti dalam sereta resia. Iya nemu utai ti dilalaika dalam pemetang, lalu Iya Empu diau dalam penampak. (Daniel 2: 22)

PERAGAM

Sapa ulih lari ari Allah Taala, ulih ngelalaika dosa tauka penyalah diri ari Iya? Nadai siku orang ulih ngelalaika ulah enggau penyai diri ari Allah Taala. Nadai siku mensia ulih bulaka Iya. Semua utai ditemu Iya magang laban Iya ti nempa semua utai. Dalam cherita Jonah, Iya diasuh Allah Taala mai pesan ngagai orang Nineweh, madahka sida deka diukum enti sida enda ngesal ati ke dosa sida. Tang Jonah enda nitihka jaku Allah Taala; Iya lari ngena kapal ti belayar ke menua Tarsis. Tang Allah Taala ngasuh kabut besai nyadi ti nyau deka ngaramka kapal nya. Udah bala kelasi kapal nemu penyalah Jonah nya ti ngujungka kapal sida nyau deka karam, sida muai Iya ari kapal. Jonah lalu ditelan siku ikan ti besai tang ulih pengawa nyelai ari Allah Taala, Jonah idup dalam perut ikan. Maya Iya agi dalam perut ikan, Jonah ngesal ati lalu besampi ngagai Allah Taala. Ketegal nya Allah Taala ngasuh ikan mai Jonah ngagai tebing tasik lalu ngeluaka Jonah dia. Ari cherita tu, kitai nemu kitai nadai ulih lari tauka belalai ari Allah Taala. Hebrew 4:13 ngelalau kitai munyi tu, “Nadai utai ulih dipelalaika ari Allah Taala. Semua deka dikebak lalu diayanka magang di mua Iya. Lalu semua kitai enda tau enda madahka pasal diri empu ngagai Iya.” Nya alai kitai patut mansang ngagai Iya, ngaku penyalah kitai lalu minta kasih Iya.

KEREJA

Aram kitai ngelalau diri empu pasal dosa kitai ti enda ulih dipelalaika kitai ari Allah Taala. Kitai patut ngubah pengidup kitai lalu ngelakka kuasa Roh Kudus nempa sereta nguduska kitai, ngambika kitai ulih ngemeranka pengidup ti manah di mua Allah Taala.

SAMPI

Tuhan Allah Taala, aku enggau ati ti baruh datai ngagai Nuan minta Nuan ngampun semua dosa aku ti dilalaika ari Nuan. Apai, tulung aku muai semua pengingin ati ti jai lalu beri aku pengering ngalahka semua pengelemi roh ti dalam aku. Aku minta tu dalam nama Tuhan Yesus Kristus. Amin.

23 MARCH 2022 – “NGASIKA ADAT KE UDAH DIAJAR AKU NGAGAI KITA”

BACHA: ULANG ADAT 4:1-9

Udah nya Moses lalu bejaku ngagai orang mayuh, “Kita enda tau enda ngasika semua adat ti diajar aku ngagai kita. Nya baru kita deka idup lalu ngalahka menua ti diberi TUHAN Allah Taala aki ini kita, ngagai kita.” (Ulang Adat 4:1)

PERAGAM

Lebuh bansa Israel nyau semak menua Kanaan ti disemaya Allah Taala deka diempu sida, Moses ngingatka sida pasal jaku Allah Taala, tentang utai ti udah dikereja Iya ke sida lebuah sida dilepaska ari nyadi ulun di menua Ejiip. Taja Moses empu enda dikemendarka Allah Taala masuk menua Kanaan, tang Iya dekaka bansa Israel enggau peturun sida, ti deka ngempu tanah menua Kanaan, ngasika pesan Allah Taala ti diberi Iya ngagai sida nengah Moses di Bukit Sinai. Moses ngelalau sida ngambika sida ukai semina nemu tang ngasika jaku Allah Taala dalam pengidup sida. Jaku ti disebut Moses tu ngingatka kitai pasal pemesai reti ngasika jaku Allah Taala baka ke disebut Masmur 119:13-16 munyi tu: “Aku deka madahka semua adat ti udah diberi Nuan. Aku gaga ati nitihka adat Nuan, lebih agi ari ke gaga ati ngembuan mayuh reta. Aku belematika atur Nuan, lalu meratika ajar Nuan. Aku gaga ati ke adat Nuan. Aku deka seruran ingatka pesan Nuan.”

KEREJA

Jaku Allah Taala meri kitai pengelantang ti meruan belama Iya, lalu ngambika jaku nya nyadi berekat ke orang bukai, kitai patut ngemeranka pengidup ti beurat ba jaku Allah Taala lalu betan erat ba Iya baka pun kayu ti betan erat ulih akar Iya ba tebing sungai (Mazmur 1:3).

SAMPI

Allah Taala, saup aku selalu ngasi sereta belematika jaku Nuan ti idup. Asuh aku ngasika pesan Nuan, lalu anang ngelengkaka aku ngambika aku seruran semak Nuan. Tukangka pintu ati aku ngambika jaku Nuan ti idup tau tumbuh galak dalam aku. Aku besampi dalam nama Jesus Kristus ti Tuhan aku. Amin.

24 MARCH 2022 – NGEMEDIS DIRI EMPU

BACHA: JEREMIAH 7:16-23

“Tang kati sida amat ngemediska ati Aku? Ukai. Sida semina ngemedis sereta ngemaluka diri empu.” (Jeremiah7:19)

PERAGAM

Mayuh pansik mandangka mensia takut bejaku di mua mayuh, lebih agi ari takutka pemat. Uji kitai mikir enti sema kitai diasuh meri pesan ti changka (tajam) ba mua mayuh di rumah sembiang. Tu mih pesan ti diasuh TUHAN kenataika Jeremiah pasal dosa Israel. Siti ari pesan nya bejakuka perangai Israel ti bepura-pura enggau nipu diri. Taja pen ngereja mayuh penyalah, orang Israel mengkang ngagai rumah sembiang baka ke nadai utai salah nyadi. Amat bendar, lebu sida belanda ngagai rumah sembiang lalu ngumbai iya alai perumpak belalai, sida ngelakar diri empu, ngerunding TUHAN enda mudah ngerusak rumah Iya. Bepura-pura sereta nipu diri empu, sida nyebut, “kami likun! tu rumah TUHAN, tu rumah TUHAN.” Pelajar ari Shiloh ngingatka Israel TUHAN enda nyaga rumah Iya enti orang dia mengkang bedosa. Jeremiah terus-terang madahka dosa sida. Sida udah enda adil enggau orang kampar sereta enda bepenyalah. Dosa ti besai agi iya nya dosa nyembah engkeramba enggau enda ngesal ati. Dosa nyembah engkeramba ukai semina ngasuh TUHAN ringat tang mega mai pengerusak ngagai sida empu. TUHAN ngajar, “Lalu Aku ngasuh sida diau nitihka jaku Aku, ngambika sida mujur.” Gawa enggau ngasika TUHAN enda baka ti gawaka tuai ti mangah laban adat TUHAN nya manah ke kitai, lalu ngasika Iya mai berekat enggau pemuas ati ti bendar.

KEREJA

Perangai ti enda ngasi ngasuh kitai enda teulih tauka ngasaika berekat TUHAN. Enti nadai kaul ti ngasika TUHAN, kitai enda teulihka utai ti pepadu manah ari Iya. Peratika siti utai dalam pengidup nuan ti ngasuh nuan enda teulihka utai ti pepadu manah ti udah ditaga TUHAN ke nuan; udah nya kereja pengawa ti enda dikereja orang Israel – iya nya ngesal ati ke dosa sereta minta pengampun.

SAMPI

TUHAN, dosa aku ukai semina ngemediska ati Nuan, tang iya mega ngemedis pengidup aku. Aku minta ampun ke semua penyalah aku ti udah enda ngasika Nuan. Tulung aku ngasika adat Nuan laban pengasi nya mai berekat ti besai ke aku. Dalam nama Jesus aku besampi. Amin.

25 MARCH 2022 – PULAI BARU NGAGAI ALLAH TAALA

BACHA: HOSIA 14:1-UJUNG

“O kita orang Israel, pulai mih kita baru ngagai Tuhan Allah Taala kita. Dosa kita udah ngasuh kita tesangkut lalu tetینگkap.” (Hosia 14:1)

PERAGAM

Pesan nabi Hosia amat mudah, tang iya bisa sereta besai reti. Iya bejaku ngagai orang bansa Israel ngasuh sida ngelengkaka dosa sida lalu pulai baru ngagai Allah Taala sida. Ba bap terubah bup Iya, Hosia udah nyebut pasal dosa orang Israel ti ngelaban Allah Taala. Sida udah tesat ari jalai Iya. Sida nadai nangi sereta arapka Iya, nya alai lebuch sida bisi penusah, sida ngiga tulung ari menua bukai. Ketegal nya sida mega nyembah engkeramba ti petara bansa bukai. Taja sida udah ngaga mayuh dosa, tang Allah Taala agi nelap sereta rinduka sida. Iya dekaka orang Israel pulai baru ngagai Iya. Sida nya dikumbai bansa ti dipilih Allah Taala, nya alai sida enggi Allah Taala. Menua bukai endang enda ulih nulung sida, engkeramba ti disembah bansa bukai mega nadai ulih ningaka sabak sida. Nya alai Tuhan Allah Taala ngasuh sida ngelengkaka dosa sida lalu pulai baru ngagai Iya. Laban Tuhan Allah Taala agi rinduka sida, Iya dekaka sida nyadi enggi Iya. Nya kebuah Allah Taala nyebut, “Aku deka mai bala nemiak Aku pulai baru ngagai Aku.” (Hosia 14:4)

KEREJA

Aram kitai, enggau ati baruh sereta ngesal, ngelengkaka dosa kitai lalu pulai ngagai Allah Taala kitai. Aram kitai ngaku dosa kitai ngagai Iya lalu nyambut Iya dalam ati kitai. Iya endang selalu nganti kitai, baka apai ti nganti anak ti tesat pulai baru. Apai ni ti enda kasih sereta rinduka anak iya lalu nyambut iya lebuch iya pulai?

SAMPI

Apai kami ti di serega, kami selalu rinduka utai dunya. Kami selalu amuka kuasa, duit enggau nama. Nya alai kami selalu manggaika pengidup kami ba utai dunya; kami selalu ngiga penyamai ari orang ti diatas kami; lalu ngiga penyelamat ari kuasa ba dunya tu. Kami minta Nuan nulung kami lalu nyaup kami ngambika kami ulih tetemuka jalai Nuan. Keringka pengarap kami laban Nuan siku aja ti ulih alai kami bepanggai. Sampi tu di pinta dalam nama Yesus Kristus ti Tuhan kami. Amin.

26 MARCH 2022 – “AKU BEGUNAKA PENERINDU TI MERUAN BELAMA IYA, UKAI PIRING”

BACHA: HOSIA 6:1 – 10

Aku begunaka penerindu ti meruan belama iya, ukai piring. Aku rindu agi ke kita nemu Aku, ari kita ke meri piring tunu ngagai Aku. (Hosia 6:6)

PERAGAM

Semua utai ti di serega enggau di dunya endang digaga Allah Taala magang. Semua nya, nyengkaum kitai mensia, digaga Allah Taala kena ngemuaska ati Iya. Kitai digaga awakka ngemulia, bekereja sereta nyembah Iya ti udah ngaga kitai. Enti kitai ngenuluka Allah Taala ari pengidup kitai empu, kitai deka bulih ukai semina utai ti diguna kitai, tang utai ti nadai kala diperagamka kitai, iya nya utai ti udah disediaka Allah Taala ke orang ti rinduka Iya. Tuhan rinduka kitai datai ngadap sereta nyembah Iya. Iya rinduka kitai nemu sereta ngelala Iya. Iya enda rinduka piring baka ti diberi sekeda orang ngagai antu enggau petara bukai. Allah Taala dekaka kitai nyerahka tubuh diri nyadi piring ti idup, ti kudus, ti dikerinduka Iya. Dulu suba kitai berserara sereta ngejang ari Allah Taala ketegal pengekieh kitai nitihka jalai diri. Tang diatu kitai nyembah Iya kena nunjukka penerindu kitai ke Iya, baka Iya ti udah dulu rinduka kitai lebu Iya ngirumka Anak Iya nyadi piring muai dosa. Ketegal tu, aram mih kitai meri diri nyembah Iya, ukai semina maya Hari Minggu aja, tang genap hari sepemanjai umur kitai, laban nya mih tuju Allah Taala ngaga kitai.

KEREJA

Sagam kebuah enggau tuju nuan ti digaga Allah Taala. Belajar rindu nemu, rindu ngelala sereta rindu nyembah Allah Taala, ukai ketegal asai kena pejal tang ketegal pengangkun ti datai ari ati nuan ti tuchi.

SAMPI

Allah Taala ti Apai kami, terima kasih ke pemanah Nuan ti udah ngaga sereta nempa kami, lalu mai kami pulai baru ngagai Nuan nengah Anak Tunggal Nuan ti nyadi genselan kena nebus kami, ngambika kami jera ngereja penyalah, tang semampai rindu muji, ngemesai sereta ngemuliaka nama Nuan dalam pengidup kami. Dalam nama Jesus Kristus ti Tuhan aku besampi. Amin.

**27 MARCH 2022 (HARI MINGGU KEEMPAT MUSIN LENT)
- MUAI PEMALU TI UDAH NYADI ULUN**

BACHA: JOSUA 5:9-12

Ku TUHAN bejaku ngagai Josua, "Sehari tu Aku udah muai pemalu kita nyadi ulun di menua Ejip." Nya kebuah endur nya dikumbai Gilgal, lalu nama nya mengkang dikena nyentuk ngagai sehari tu. (Josua 5:9)

PERAGAM

Sehari tu kitai beratika pengawa ti pemadu besai ke udah digaga Allah Taala ke bansa Israel, ke lya ke udah muai pemalu sida ke nyadi ulun di menua Ejip lalu mai sida ngagai Tanah Semaya. Chara Allah Taala ngelepas sereta muai pemalu ari sida tau bendar meri peransang ngagai kitai orang Kristian laban kitai mega baka orang Israel ti udah dilepaska Allah Taala ari ulun dosa ulih pematu Anak lya ba kayu regang. Maya Musin Lent tu, kitai beratika pemedis ti diasai Tuhan Jesus lebu lya bepasa empat puluh hari enggau empat puluh malam di menua puang enggau maya lya ke mati ba kayu regang. Kitai orang Kristian patut nemu pemesai reti pemedis enggau pemerinsa, kelebihan agi maya diatu, ti alai kitai agi belaban enggau penyakit Kovid-19. Laban diatu kitai balat ngasaika pemedis enggau pemerinsa tu, kitai mega patut nemu kitai udah dilepaska ari "pemalu" ditangam dosa enggau pematu. Taja pen mayuh mensia enda nerima pengawa Jesus ti diregang, kitai patut ingatka lalau Paul ke munyi tu, "Laban pesan pasal regang nya utai ti mapap ba orang ke deka mati, tang ba kitai ke diselamatkan, pesan nya kuasa Allah Taala." (1 Korint 1:18)

KEREJA

Perundingka reti guna pemedis enggau pemerinsa dalam pengidup kitai orang Kristian. Baka nya mega perundingka chara Tuhan udah muai "pemalu" kitai ari dosa sereta udah ngelepaska kitai ari kuasa pematu.

SAMPI

Apai kami ti di serega, terima kasih ke Nuan ke udah meri kami pengering enggau pengerai lebu kami kena tuntung penusah maya penyakit Kovid-19. Terima kasih mega ngagai nuan Apai ke udah muai "pemalu" kami ari nyadi ulun dosa. Sampi tu disebut kami dalam nama Anak Nuan Jesus Kristus ti Tuhan enggau Pengelepas kami. Amin

28 MARCH 2022 – DUNYA TI BARU.

BACHA: ISAIAH 65:17-25

Ku TUHAN bejaku, “Aku ngaga langit ti baru enggau dunya ti baru. Semua utai ti lama, enda agi dikingatka.” (Isaiah 65:17).

PERAGAM

Ni gaya tempat ti pemadu dikerindukan nuan alai ngelantangka diri? Nama utai ti ngasuh tempat nya “*special*”? Kati iya nya tempat ti likun ti ngasuh ati nuan rindu sereta gaga? Ni pengelaman nuan deka diau dia? Nuan engka enggai lama, laban ba nuan tempat nya semina tempat ti meri pengerindu sementara aja. Dalam bacha kitai seharitu, TUHAN mandangka ngagai Isaiah atur ti baru enggau dunya ti baru ti deka digaga Iya. Isaiah madahka TUHAN benung dalam proses ngaga dunya baru, serega ti meruan belama iya, ti digaga TUHAN ke nemiak Iya, ti ulih dipeda maya timpuh udah datai. Tempat nya penuh ulih pengidup ti alai orang nadai ngulit tauka nyabak. Tiap iku mensia ti diau dia idup enggau penuh. Pemaik enggau pengidup ti betuah-belimpah endang diasaike belama, lalu mensia nadai bechurika kereso pangan diri. Semua jelu dia jinak magang laban sida enda ibuh agi bebunuh enggau bepakaika pangan diri. Tu tempat ti bisi pengaga (ayat 17-20), tempat ti betuah-belimpah (ayat 21-23), enggau tempat ti bisi pemaik (ayat 24-25).

KEREJA

Peratika pemanah dunya ti baru ti deka digaga TUHAN. Jam ke diatu kitai diau ba dunya ti mayuh pemedis. Penanggul tu bepun ari dosa ti udah ngamahka utai ti udah digaga sereta dipadahka TUHAN kudus. TUHAN benung dalam proses nebus utai ti udah digaga Iya. Nama bagi pengawa kitai? Pengawa kitai nya ngerunding nama utai ti patut dikereja kitai lebu kitai nganti TUHAN ngaga dunya tu baru. Kitai mega patut beratika ati, perangai, enggau kereja kitai, sekalika pengidup kitai bisi mandangka pengarap enggau pengadang ti udah disemaya TUHAN ke kitai.

SAMPI

Terima kasih, Apai, ke pengadang pasal dunya baru ti ditebus sereta digaga baru, ti alai pemaik enggau pemedis nadai agi. Saup aku ngambi bagi dalam anggur nuan ti besai ke dunya baru nya. Iri ati aku enggau pengadang laban iya endang utai ti dikinginka aku. Dalam nama Yesus aku besampi. Amin.

29 MARCH 2022 - AI SUNGAI TI MAI PENGIDUP

BACHA: ESEKIEL 47:1-9, 12

Enda milih tunga ai sungai nya rarat, endur nya deka bisi semua macham jelu enggau ikan. Ai sungai nya deka ngasuh ai dalam Tasik Mati tabar, lalu enda milih tunga ai nya rarat, iya deka ngasuh utai dia idup. (Esekiel 47:9)

PERAGAM

Peragam kitai ke seharitu nya pasal "Ai sungai ti mai pengidup." Ai nya utai ti amat berguna ke pengidup mensia enggau utai bukai ke idup di dunya tu. Ba kitai orang Kristian, Tuhan Jesus nya mih ai sungai ti mai pengidup. Ketegal Iya, kitai deka idup belama iya, lalu enti kitai ngasika Iya, kitai deka nerima utai ti manah berari ari Iya laban Iya nya Mata Ai lalu kitai ti datai ngagai Iya enda nemu aus. Nya alai, kitai patut arapka jaku Iya, nitihka pesan Iya sereta ngasika ajar Iya, ngambika pengidup kitai meruan dalam Iya. Maya penusah penyakit Kovid ke diatu, pengarap kitai mayuh diuji; lalu sekeda mensia munuh diri laban sida ngasaika pengarap sida nadai reti agi. Diatu mih maya kitai patut meresa pengarap diri ke Tuhan Jesus. Ku Iya, "Kitu, datai ngagai Aku, arapka Aku, lalu Aku deka meri kita pengelantang enggau pengidup ti meruan." Enti kitai meruan teguh ba pengarap dalam Iya, kitai deka menang datai ke pengujung dunya. Nya alai, kitai patut bebendar manggaika pengarap kitai ba Tuhan Jesus, ukai ba petara bukai ti nadai kuasa.

KEREJA

Perundingka diri empu nyadi ai pengidup ti sebaka enggau Tuhan Jesus ti pun pengarap kitai. Kereja pengawa ti mandangka kitai nya amat murid Tuhan Jesus, lalu bai orang bukai ti apin ngelala Iya nuju jalai pengidup ti meruan. Kereja mih tu seagi-agi kitai bisi peluang.

SAMPI

Tuhan Allah ti pepadu Bekuasa, Anak Nuan nya endang Pun Mata Ai Pengidup. Ari Iya pengidup datai lalu pengarap kami bepun. Kami besampi minta kuasa berekat Nuan meruan diau dalam kami di sebarang endur kami diau enggau bekereja. Kena mih kami ngambika kami seruran nyadi berekat enggau pengelantang ke orang ti datai ngagai Nuan. Ulih Jesus Kristus Tuhan kami. Amin.

30 MARCH 2022 - ALLAH TAALA TETAP ENDA NGELENGKA

BACHA: ISAIAH 49:8-15

Nya alai TUHAN nyaut, "Kati indu enda ingatka anak diri lalu enda rinduka anak ke diadaka iya empu? Enti sema indai enda ingatka anak diri, Aku deka seruran ingatka kita." (Isaiah 49:15)

PERAGAM

Ketegal dosa, mayuh kitai mensia ngasaika diri nadai pengadang sereta nadai peluang bulih selamat enggau berekat ari Allah Taala. Tu mih asai ati orang Judah lebuah sida alah laban munsuh lalu dibuai ngagai menua Babilon ketegal sida ke enggai manggaika pengarap sida ba Iya. Isaiah 49:15 bejaku pasal pemesai pengerindu enggau pengasih Allah Taala. Di dunya tu nyangka nadai siku indai ti ngadaka anak iya sanggup ngelengka sereta ninggalka anak iya. TUHAN mega baka nya lalu enda ngelengkaka kitai. Iya tetap ingat lalu rindu sereta meruan enggau kitai nyentuk ngagai pengujung dunya. Tiap iku mensia kala ngasaika pengidup kediri sereta enda diguna orang. Nengah Nabi Isaiah, Allah Taala madahka kitai Iya seruran deka enggau kitai taja pen kitai engka bisi kena tinggal, dilengka, enda dipedul, enda dikibuh, enda dikingat, enda diambil berat, enda dibasa, enggau enda diguna orang. Masmur 27:10 bisi nyebut munyi tu, "Apai enggau indai aku nyangka deka ngelengkaka aku, tang TUHAN deka ngibun aku." Allah Taala nya baka siku apai ti nelap, sabar, sereta bepengasih (Masmur 103:13) ti rindu, sayau sereta kasihka anak iya.

KEREJA

Perundingka jaku ajar ba Isaiah 49:15 lalu ngesalka semua pekara ti salah ti udah dikereja kitai. Beri terima kasih ngagai Allah Taala laban taja kitai suah ngelengkaka Iya, tang Iya tetap enda ngelengkaka kitai.

SAMPI

Apai, aku tu nemiak Nuan ti selalu ngereja penyalah, lalu aku suah enda ngasi sereta ngelengkaka ajar enggau pesan Nuan. Aku ngesalka penyalah diri lalu minta ampun ari Nuan. Terima kasih Apai, laban Nuan tetap enda ngelengkaka aku. Aram, tama sereta diau dalam pengidup aku, lalu nyadi Petara enggau Juruselamat aku. Aku besampi di dalam Nama Anak Nuan, Yesus Kristus, Tuhan enggau Pengelepas aku. Amin.

31 MARCH 2022 - NAMA KEBUAH ALLAH TAALA NGUBAH PENEMU IYA.

BACHA: PEMANSUT 32:7-14

Tuhan lalu ngubah runding Diri, lalu enda nyadi ngasuh penusah ti besai ninggang nemiak Iya. (Pemansut 32:14)

PERAGAM

Pemansut 32 nyeritaka baka ni bansa Israel bedosa ngelaban Allah Taala maya Moses benung enggau Allah Taala ba Bukit Sinai. Sida ngaga engkeramba ari emas baka gambal anak sapi lalu nyembah iya. Tu pengawa ti amat salah di mata Allah Taala ti ngasuh Iya ngeransi deka ngerusak sida. Tang Moses bejaku enggau Allah Taala, minta kasih Iya ngambika Iya enda ngerusak sida. Laban Allah Taala nya besai pengasih lalu Iya ingatka semaya Iya enggau Abraham, Isak enggau Jakop, Iya ningaka peminta Moses, ngubah runding Iya lalu enda nyadi ngerusak bansa Israel ti udah bedosa ngelaban Iya. Tu ngayanka Allah Taala ningaka sampi; Iya ningaka sampi Moses lalu ningaka penemu Moses. Enti kitai besampi nitihka peneka Allah Taala, Iya mega deka ningaka sampi kitai, lalu tau ngubah penemu enggau runding Iya laban Iya rinduka kitai.

KEREJA

Kitai patut belajar ari Moses pasal pemesai guna kitai besampika orang bukai. Lebu kitai besampika orang bukai, kitai ulih ngasaika pemedis enggau penanggul dalam pengidup sida. Pengawa besampika orang bukai nya ukai semina ngayanka kitai beratka pengidup sida, tang iya mega ngayanka kitai nya nemiak Kristus ti seruran ibuhka orang bukai.

SAMPI

Apai, saup kami bekereja nunda peneka Nuan. Saup kami sinu, nunda ati Nuan. Saup kami beratka penusah orang bukai, sama baka Nuan ti beratka dunya tu, ti alai Nuan udah balat rinduka dunya, lalu nengah kayu regang, Anak Nuan udah nebus dunya tu, ngambika semua mensia ti udah nerima Nuan diau jenuh ba terekun jari Nuan. Ulih Nama Jesus Kristus ti Tuhan enggau Juruselamat kami. Amin.

1 APRIL 2022 – PEMESAI GUNA NGASIKA ALLAH TAALA

BACHA: JEREMIAH 26:1 - 15

*“... Enti sida ngelengkaka ulah sida ke jai, nya baru Aku deka ngubah runding Aku lalu enda nyadi ngerusak sida ketegal semua pengawa sida ke jai.”
(Jeremiah 26:3)*

PERAGAM

Nabi Jeremiah tama ke Rumah Sembiang lalu bejaku ngagai orang ke datai ari semua tempat di menua Judah ke datai sembiang kia. Iya bediri ba tengah laman Rumah Sembiang lalu meri jaku tangkan ngambika sida ngelengkaka ulah sida ke jai lalu pulai baru ngagai Allah Taala. Ku iya, enti sida enggai ngasika Tuhan, rumah Sembiang nya deka dirusak, baka ke nyadi ba rumah sembiang di Siloh dulu menya. Bala imam, sida nabi enggau orang mayuh ke bisi dia ringgat amai lebuch sida ninga jaku nabi Jeremiah. Sida nangkap iya lalu deka munuh iya. Lebuch penyarut nya benung nyadi, bala tuai orang Judah lalu beguai-guai mansang ngagai Rumah Sembiang. Orang mayuh, nyengkaum sida imam enggau sida nabi minta ngambika nabi Jeremiah nya diukum bunuh. Tang Jeremiah nyaut madahka iya semina ngenataika jaku Tuhan ngambika mensia mayuh ngubah pendiau enggau ulah sida, lalu ngasika Tuhan Allah. Iya madahka, semina ngena chara nya aja sida ulih nyelamatkan diri enggau Rumah Sembiang sida ari dirusak. Bala tuai bansa Judah nerima penerang ti diberi nabi Jeremiah.

KEREJA

Kati kitai bisi mendingka pesan ti dipadahka Allah Taala ngagai kitai? Kati kitai besedia deka ngasika Iya dalam semua hal?

SAMPI

Tuhan Allah Taala, buka pending kami ngambika kami ninga Nuan; lalu keringka kami ngambika kami ulih ngasika Nuan dalam semua pekara enggau sebarang maya. Amin.

2 APRIL 2022 – SIDA DEKA NYADI NEMBIAK AKU

BACHA: JEREMIAH 11:1-23

“... Aku mai sida pansut ari menua Ejip, menua ti baka serumbung api ke sida. Aku udah ngasuh sida ngasika Aku, lalu ngereja semua utai ti udah diasuh Aku. Aku udah madahka ngagai sida, enti sida ngasi, sida deka nyadi nembiah Aku, lalu Aku deka nyadi Allah Taala sida.” (Jeremiah 11:4)

PERAGAM

Aku ingat lebuah aku agi biak, apai aku enggai melika aku pemeru enti aku enda ngasika iya tauka enda ibuhka jaku iya. Iya mega enggai nulung aku lalu enda ibuhka utai ti dipeguna aku enti aku ngelaban iya. Ari bacha kitai ke seharitu, Allah Taala mega ngereja utai ke sama enti nembiah Iya enda ngasika Iya lalu nyembah petara bukai. Allah Taala nyumpah sida laban sida enda ibuhka sempekat ti digaga Iya enggau sida. Ketegal nya, Allah Taala ngukum sida lalu enda ningaka sampi sida taja pen sida balat kena penusah. Allah Taala nya kudus sereta lurus, lalu Iya ngukum orang ti jai ti enda ngasika Iya, enda ngira sapa sida nya. Semua kitai deka diakim magang lebuah Juruselamat kitai Yesus Kristus datai baru. Tang Allah Taala nya pengasih lalu enti kitai ngesal ati, Iya deka ningaka kangau kitai lalu ngampun kitai enti kitai enggau ati ti lurus ngiga Iya. Taja pen kitai ukai diselamatkan ulih kereja manah ti digaga kitai, tang Bup Kudus terang bendar madahka pengarap ti nadai disimpulangka enggau kereja manah nya pengarap ti mati. Lebuah kitai ngasika Allah Taala baka ngasika Apai ti besai pengerindu lalu ngereja pesan Iya, kitai deka nyadi nembiah Iya lalu Iya deka meri kitai upah ti chukup besai.

KEREJA

Baka ni nuan ngereja jaku Allah Taala dalam pengidup nuan ninting hari? Kati nuan ngasi lalu ngereja iya dalam semua hal dalam pengidup nuan?

SAMPI

Apai ti kasih, tulung aku ninga sereta ngasika jaku Nuan dalam semua hal dalam pengidup aku. Beri aku pengering ngasika pesan Nuan ngambika aku nyadi orang ti dikerinduka Nuan lalu bisi kaul ti rapat enggau Nuan, ulih Yesus Kristus ti Tuhan aku. Amin.

3 APRIL 2022 (HARI MINGGU KELIMA MUSIN LENT)
- TUHAN DEKA MUKA JALAI -

BACHA: ISAIAH 43: 16 – 21

“Peratika utai ti baru, ti deka dikereja Aku. Utai nya benung nyadi, lalu kita ulih meda utai nya diatu! Aku deka ngaga jalai raya nengah menua puang lalu meri kita ai sungai di menua puang nya.” (Isaiah 43:19)

PERAGAM

Bansa Israel nya orang ti dipilih Allah Taala, tang sida majak bedosa sereta enda ngasika Iya. Tang Allah Taala taluk lalu besemaya sekali agi deka ngintu lalu nyediaka utai ti dipegunaka sida. Iya nyelamatkan sida ari menua Ejipt, Iya melah ai tasik sereta muai kerita kuda, kuda enggau orang ti nepan ke dalam tasik. Allah Taala mega besemaya deka nyelamatkan sida ... “Peratika utai ti baru, ti deka dikereja Aku.... Aku deka ngaga jalai raya nengah menua puang lalu meri kita ai sungai di menua puang nya.” Siti ari “utai ti baru” nya Allah Taala “deka ngaga jalai” nengah menua puang lalu nyediaka ai ba tempat nya, ngubah iya nyadi tanah ti ami. Kitai patut ingat, Isaiah nya nabi ke Messiah ti deka datai, iya nya Juruselamat kitai. Orang Israel ti diselamatkan ari nyadi ulun di menua Ejipt nya tanda mensia diselamatkan ari ulun dosa enggau pemati. Bansa Israel ti bejalai dalam Tasik Mirah nya nunjuk ngagai pengawa orang ti arap ti deka dibaptisa ngena ai. Allah Taala endang deka ngaga utai nyadi baru; “Aku ngaga semua utai nyadi baru magang!” (Pemandang 21:5). Naka mih pemesai semaya Allah Taala tu ke kitai! Lebu kitai majak bejalai enggau Allah Taala, dalam penampak enggau pemendar Iya, kitai pasti deka ngasaika pemendar Allah Taala enggau pengidup selamat ari Iya.

KEREJA

Kati bisi “menua puang” dalam pengidup nuan? Kati nuan kala ngasaika pengidup nuan udah tepantup ba dinding lalu nuan nadai jalai ngeluarka diri? Tang ingat; Jesus deka ngaga jalai dalam pengidup ti nadai jalai.

SAMPI

Tuhan Allah Taala, terima kasih ke penaluk enggau pemanah Nuan. Tulung aku arapka Nuan, nyengkaum maya pengidup aku enggau orang ke semak aku nyau baka menua puang. Aku arap Nuan endang deka ngaga jalai lalu awakka ai sungai pengidup Nuan mai berekat dalam pengidup kami. Amin.

4 APRIL 2022 - TUHAN ARI ATAS SEMUA

BACHA: JOSUA 2:1-14

“Lebuh kami ninga nya, kami takut, lalu kami enda berani ngelaban kita. TUHAN Allah Taala kita endang amat Allah Taala ti bekuasa di serega enggau di dunya.” (Josua 2:11)

PERAGAM

Josua ngasuh orang matau negeri Jeriko sebedau iya nyerang negeri nya laban negeri nya dilindung kubu ke tegap. Josua nemu pengawa ti nganjung bala pematau sebedau nya ngujungka bansa Israel bulih penusah (Penyampau 13:1-14:4). Tang Josua enggai angkat nyerang enti apin bulih penerang ti betul pasal munsuh. Iya mega enggaika bala iya tusah, lalu ngembuan pengakang ati pasal pengulih iya nyadi tuai sida. Nambahka nya, bala pematau bepanggai ba Rahap, iya nya siku indu sundal orang Kanaan ke pagan. Tang Rahap bersedia ninggalka semua utai ke dikemisi iya ketegal TUHAN ti enda dikelala sereta ditemu iya. Nya alai kitai enda ulih ngakim orang siku-siku bepanggai ba penatai, pendiau tauka gamal iya. Rahap nemu bisi pekara ti enda ditemu mayuh orang di Israel - iya nya Allah Taala ti di serega nya ukai sebarang Tuhan! Iya bekuasa ba atas semua. Orang Jeriko takutka Iya laban ningga berita pasal pemesai kuasa Iya ti udah ngalahka munsuh ba seberai Sungai Jordan. Seharitu kitai nyembah Allah Taala ti sama - ti ngembuan kuasa sereta ulih ngaga kereja ajih. Iya bekuasa ari atas semua lalu ulih ngelepaska kitai ari “pemati” baka ti dikereja iya ba Rahap.

KEREJA

Kitai belematika pengidup Rahap, indu ti bedosa, ti datai ari bansa ti nadai arapka Allah Taala tauka kala ningga jaku pasal Allah Taala. Enti orang baka Rahap ulih dikena Allah Taala, kitai nadai kebuah enda ulih meritaka pasal Iya ngagai orang bukai.

SAMPI

Allah Taala, Apai kami ti di serega, terima kasih ke mayuh macham pekara ti dipelajarka kami ari Josua. Aku besampi enggau penuh pengarap, nguji ngereja pengawa nitihka peneka Nuan, lalu enggau ati ti berani nabi sebarang penusah. Sampi tu dipinta aku dalam nama Jesus Kristus ti Tuhan enggau Pengelepas aku. Amin.

5 APRIL 2022 - TUHAN NGERAIKA KITAI

BACHA: PENYAMPAU 21:4-9

Udah nya, TUHAN lalu ngasuh Moses ngaga siku ular ari temaga, lalu nuatka ular nya ngena siti tiang; barang sapa kena pantuk ular, deka merening ngagai ular nya, lalu gerai. (Penyampau 21:8)

PERAGAM

Orang Israel balat ngasaika pemedis lebu sida bejalai diuluka Moses nuju menua ti disemaya ke sida. Ketegal nya sida mut-mut nganu Moses enggau Allah Taala. Allah Taala lalu ngukum sida ngena pantuk ular bisa ti ngujungka mayuh ari sida mati. Sida lalu ngesalka dosa sida lalu minta kasih Allah Taala. Ketegal nya Allah Taala ngasuh Moses ngaga siku ular ari temaga ti dituat ba siti tiang, lalu lebu sida malik sereta merening ngagai ular nya, sida deka digeraika ari pantuk ular. Baka nya mega kitai ti ngesal ati ke dosa; lebu kitai malik sereta merening ngagai pemat i Jesus ba kayu regang, kitai deka digerai sereta diselamatkan ari rachun dosa, lalu tau bulih pengidup ti meruan betuaika Allah Taala ti di serega.

KEREJA

Maya Musin Lent tu, aram kitai ngelalau diri empu, ngambika kitai seruran malik ngagai Tuhan Jesus ti mati nanggung dosa kitai ba kayu regang. Aram kitai ngereja peneka Iya ngambika bulih selamat sereta diberi pengerai, pemujur enggau pengelantang dalam pengidup.

SAMPI

Allah Taala, Apai ti di serega, aku deka manggaika ati aku ti agi kieh ketegal dosa ti agi malut pengidup aku. Aku selalu mut-mut ngutuk Nuan lebu maya aku ditinggang penusah, penyuntut, pemerinsa enggau penyakit ba tubuh enggau semenggat aku. Asuh aku belajar beperagamka pemat i Jesus ba kayu regang ngambika aku enda agi mai ati ti kieh ngelaban atur Nuan. Aku manggaika pengidup aku ba Nuan ti Tuhan Allah Taala aku. Dalam nama Jesus Krsitus Tuhan aku besampi. Amin.

6 APRIL 2022 - ANANG NYEMBAH PETARA BUKAI

BACHA: DANIEL 3:14-20, 24-25, 28

“Tang enti Iya enda ngelepaska kami, kami madahka ngagai nuan Tuan Raja, enggai mih kami nyembah petara nuan, lalu meremi ngagai engkeramba emas ti didirika nuan.” (Daniel 3:18)

PERAGAM :

Lebuh Allah Taala ngangauka Moses ba Bukit Sinai, Iya meri Moses Sepuluh Pesan. Pesan ti keterubah madahka semina Allah Taala aja Petara ti bendar ti patut disembah (Pemansut 20:3). Pesan ti keterubah tu pesan ti pengabis besai. Reti nya berengkah ari Moses, semua nembiah Allah Taala, kelebih agi bansa Isreal kelia nyentuk ngagai kitai diatu, enda tau enda nitih sereta arapka pesan nya. Iya Allah Taala ti idup sereta pemadu bekuasa. Iya mega Allah Taala ti pemadu pengasih sereta pengerindu ti dikelala kitai dalam Yesus Kristus. Baka tiga iku pangan Daniel, ti benama Sadrak, Mesak enggau Abednego; taja pen sida kena ukum dibuai ke dalam api ulih sedadu Raja Nebukadnesar, tang laban sida talukka Pesan Allah Taala lalu enggai nyembah engkeramba emas, sida enda angus tauka mati laban api. Sida selamat lalu tu nunjukka Allah Taala ti disembah sida nya lebih bekuasa ari atas semua utai. Engkeramba nya utai sengapa, utai ti enda beseput; iya semina utai ti nesatka kitai dalam pengarap enggau jalai pengidup Roh kitai enggau Allah Taala.

KEREJA

Perundingka utai ti kala digaga nuan nyadi engkeramba lalu nganti penuduk Allah Taala dalam pengidup nuan?

SAMPI

Allah Taala, Apai ti di serega, keringka lalu tuchi ati, runding enggau semengat aku ari dosa aku ti udah ngelaban pesan enggau ajar Nuan. Asuh Roh Kudus Nuan meruan enggau aku, ngambika aku ulih nitih sereta nyembah Nuan siku aja, ulih Yesus Kristus ti Tuhan. Amin

7 APRIL 2022 – SEMPEKAT ENGGAU ALLAH TAALA

BACHA: PEMUNGKAL 17:3-9

“Aku deka ngamatka semaya Aku enggau nuan, sereta enggau peturun nuan, nyadika sempekat ti meruan belama iya. Aku deka nyadi Allah Taala nuan, enggau nyadi Allah Taala ke peturun nuan.” (Pemungkal 17:7)

PERAGAM

Nanggam sempekat tauka semaya nya utai ti manah sereta dikerinduka Allah Taala. Tang enti enda ari saup Allah Taala, nanggam semaya nya ukai pengawa ti senang dikereja. Ari saup Iya, kitai ulih nanggam sebarang semaya; sekaligus semaya enggau diri empu, enggau diri sama diri, tauka enggau Allah Taala. Enti enda ari saup Iya, kitai deka anyut ditabanka arus dunya. Pemungkal 17 nyeritaka pasal Allah Taala ti ngaga Sempekat enggau Abraham, lalu ketegal pengarap Abraham, Allah Taala besemaya deka ngasuh iya nyadi "apai ke semua bansa mensia." Allah Taala deka merekatka Abraham enti iya enggau semua peturun iya besemaya deka nanggam lalu ngereja sempekat nya. Nadai utai ti enda ulih dikereja tauka digaga nengah Allah Taala, lalu ketegal nya kitai patut ngengkahka pengarap kitai ba Iya aja; ukai ba utai bukai, baka ba manang, beliau, pengaruh enggau utai bukai. Pemungkal 17:3-9 tu mega nerangka ngagai kitai pasal penatai Sepuluh Pesan ti nyadika pelasar pengarap kitai orang Kristian. Iya nyadi lalau enggau tenggau dikena kitai nyeremin pendiau diri lebu kitai ngasaika diri bisi limpang ari jalai ti disuruh Allah Taala tengah kitai.

KEREJA

Ambi awak dalam seminit dua lalu belematika semaya ti udah digaga kitai enggau Allah Taala, iya nya: ngatur ulah diri nitihka ajar Iya; ngintu lalu nitihka peneka enggau semua pesan Iya; enggau ngereja semua pengawa orang Kristian nitihka semaya lebu kitai dibaptisa.

SAMPI

Tuhan Allah, saup aku nyidi lalu meda sempekat ti digaga Nuan enggau aku. Asuh ati aku gagit maya Musin Lent tu, lalu enti nyema aku enda ngereja sempekat nya, saup aku ulih Roh Kudus Nuan ngambika aku semampai taluk lalu ngereja sempekat aku enggau Nuan. Dalam nama Jesus Kristus aku besampi. Amin.

8 APRIL 2022 – TUHAN NYA LURUS

BACHA: JEREMIAH 20:10-13

Tang TUHAN ti Pemadu Bekuasa, Nuan endang ngabas ati enggau runding orang ngena pengelurus. Nuan nemu utai ti di dalam ati enggau runding sida. Nya alai awakka aku meda Nuan malas penyai bala munshu aku, laban aku udah manggaika pekara aku ba jari Nuan. (Jeremiah 20:12)

PERAGAM

Mayuh organisasyon ngaga pemutus penemu tu bepelasarka atur ti dipilih bala mayuh. Taja atur ti baka tu atur ti demokratik lalu dikena ba menua ti udah maju, tang iya tau disalah guna lalu ngemedis bala minoriti. Ambika banding, aku empu kala ngasaika diri ba endur ti alai jaku bala mayuh lebih agi didinga ti ngujungka aku dipaksa ngaku penyalah ti ukai dikereja aku. Tu mih penanggul atur ti baka ke lurus tu; iya mudah disalah guna lalu nguntung ke sida ke majoriti, kaya, bekuasa, tauka tebilang. Ba bacha kitai ke seharitu, utai ti sebaka nyadi ba nabi Jeremiah lebu iya ke mansutka jaku benabi madahka ukum ti deka ninggang perintah enggau menua nya. Ketegal nya, iya ditanchang ngena rantai ulih Imam Pasur (ayat 2). Orang mayuh mantaika jaku petenah sida pasal iya (ayat 10), ngarapka utai ti disebut iya nya salah. Pengujung iya, enggau ati ti balat redak, Jeremiah beserebana ngagai TUHAN, lalu enggau pengadang ti besai, iya minta Allah Taala meri atur ti lurus. Pengadang Jeremiah nya bepanggai ba pengawa ke besai ti seruran dikereja Allah Taala baka ke ditusui dalam cherita bansa sida ari serak siti ngagai serak siti (ayat 12-13), ti alai TUHAN udah nulung orang ke ninga sereta ngasika iya (ayat 12).

KEREJA

Kati kala nuan ngasaika pengidup, ti alai Allah Taala ngengkahka nuan ba endur ti alai nuan belaban enggau pemutus penemu bala mayuh? Enti bisi, terus kereja pengawa nya lalu andalka Allah Taala deka ngintu sereta ngemataka nuan.

SAMPI

Apai, lebu kami enda nemu kini ke tuju kami, enda nemu kini ke Nuan ngiring kami, saup kami andalka kereja enggau jaku Nuan ti deka muai atur ti enda lurus, lalu nganti iya enggau atur ti lurus sereta semperena maya penatai Jesus kedua kali ila. Dalam nama Jesus aku besampi. Amin.

9 APRIL 2022 – “SIDA DEKA NYADI NEMBIAK AKU LALU AKU NYADI ALLAH TAALA SIDA”

BACHA: ESEKIEL 37:21-UJUNG

“Sida deka nyadi nembiaik Aku, lalu Aku deka nyadi Allah Taala sida.” (Esekiel 37:23b)

PERAGAM

Esekiel nya siku nabi orang Judah ti sama enggau bala mayuh kena taban ngagai menua Babilon. Iya orang ti besai pengarap lalu mayuh genera ti amat nyadi ba bansa Israel. Dalam pasej tu, Esekiel nyeritaka pasal jaku Allah Taala ti deka nyatuka Judah enggau Israel nyadi siti perintah. Ba pasej tu mega, Allah Taala ngena leka jaku “Aku” enggau “sida” beulang-ulang kali. Tu mandangka Judah enggau Israel nya bansa ti dipilih Allah Taala nyadi nembiaik Iya. Allah Taala besemaya lalu udah ngamatka semaya Iya ti deka mai sida pulai baru ngagai menua sida empu lalu betuaika Iya. Allah Taala mega besemaya deka meri sida siku raja ke sebaka enggau nembiaik Iya David ti deka nyadi raja sida. Semaya tu udah dikamatka Allah Taala, ukai semina ke bansa Israel aja, tang mega ke semua mensia lebuah Iya ngirumka Anak Iya Jesus Kristus nyadi Tuhan enggau Juruselamat mensia. Ku Paul, tu Berita Manah pasal Anak Iya, ke ada nyadi mensia ari peturun David lalu nengah Iya, Allah Taala udah mai semua bansa bukai arap sereta ngasika Jesus Kristus lalu nyadi nembiaik Iya (Rome 1:3-6).

KEREJA

Perundingka orang ti ngelinggi nuan ti bedau nemu sereta nerima Jesus Kristus nyadi Tuhan enggau Juruselamat sida. Perundingka kemaya enggau chara nuan deka meritaka Injil ngagai sida.

SAMPI

Allah Taala, Apai ti di serega, terima kasih ke pengerindu Nuan ti nganjung Jesus Kristus matika dosa kami; saup aku mai orang bukai ngelala sereta nerima Jesus nya Tuhan enggau Raja sida. Amin.

Peragam Musin Lent ke nangkanka tu disalin sereta dipandakka ari
“Following Jesus to the Cross” ti dikarang Revd. Dr. Lim Kar Yong.

Iya disangkaumka ditu enggau pemendar ari Pengeluar, Our Daily Bread
Ministries.

10 APRIL 2022 (HARI MINGGU REGANG DAUN)
- JESUS TAMA NENGERI JERUSALEM ENGGAU PEMENANG -

BACHA: MARK 11:1-11

PERAGAM

Aku suah nguluka orang nemuai sambil belajar ngagai Tanah Tuchi. Selalu iya, maya di padang bilun, pengagit ti deka berangkat ke Tanah Tuchi nya sama diasaika semua bala ti enggau. Pelaba aku, pengagit ti sebaka mega bisi diasaika bala orang ti nemuai ngagai Tanah Tuchi maya Jesus kelua. Sida tu ti diau ngachir di serata menua Mediterranean, datai nemuai ngagai Jerusalem kena nyambut pengerami Gawai Paska tiap taun nitihka ajar Adat Moses. Lebuh sida nurun ari Bukit Kana nuju Jerusalem, tinjau rampa nengeri enggau pemanah rumah sembiang ngambat penatai sida. Pengelelak sida ari pejalai ti jauh enda berasai agi laban alah ulih asai ati ti andal sereta gagit lebuh sida meda rumah sembiang, ti nyadi tanda Allah Taala bisi dia ba orang Judah enggau ba rumah sembiang. Kira 2,000 taun ke udah, maya hari ke dikumbai kitai diatu Hari Minggu Regang Daun, Messiah (Jesus) ti lama udah dianti mansang ngagai Jerusalem nyerumba bala temuai pengarap. Iya nepan keledai lalu bala orang mayuh manjung enggau gaga ngelaluka Iya nya rajah sida. Tang asai ati Jesus enda senutuk enggau enggi orang mayuh. Iya nyabakka nengeri nya, laban Iya nemu Jerusalem enda ngelala pemerintah enggau rajah iya. Maya nya, rumah sembiang nadai agi dikena mai orang semak ngagai Tuhan. Tu ti nyungkak Jesus meresi rumah sembiang nya ba hari ti nangkan ke nya. Pengujung iya, rumah sembiang nya dirubuh ulih orang Rome ba taun 70 udah Kristus. Tu pengujung ti sinu amat ke menua ti nulak Allah Taala enggau Messiah Iya.

KEREJA

Jesus nyabak ke Jerusalem laban Israel udah ngelengkaka Allah Taala. Kati nuan bisi nyabak ke bansa, menua, nengeri, tauka gerija nuan ti jauh ari Allah Taala?

SAMPI

Allah Taala ti pemadu bekuasa, Anak Nuan Jesus Kristus nyabakka nengeri Jerusalem ti nulak Messiah iya. Ulih pengerindu Nuan, perening kami enggau pengasih lalu lebuh kami ngaku dosa kami, gaga dalam kami ati ti beresi lalu kemaruka kami dalam pengandal selamat Nuan. Dalam nama Jesus. Amin.

11 APRIL 2022 - JESUS BESAMPI DI KEBUN GETSEMANI

BACHA: MARK 14:32-42

PERAGAM

Ba pengujung pengidup Iya ba dunya tu, lebuh Jesus ba Kebun Getsemani, ati Iya berasai amat tusah sereta teguran. Lebuh Iya malik tunga ke barat ari kebun nya, Iya ulih meda rumah sembiang ti chukup manah. Ba rumah sembiang nya, beribu iku jelu dibunuh niting taun nyadika piring. Darah jelu ti dibunuh nya lekat ba altar. Tang darah jelu nya nadai kuasa dikena muai dosa (Hebrew 10:3-4). Lebuh Jesus meda rumah sembiang nya, Iya tentu berundingka utai ti deka nyadi ba Iya empu. Iya tentu mega berundingka darah Iya ti mega deka disiuha ba kayu regang lebuh Iya nyerahka nyawa diri nyadika piring dikena ngampun semua dosa mensia. Lebuh ti tusah ati belematika pemedis ti deka ditapi Iya ba kayu regang, Jesus lalu mai tiga iku murid Iya, iya nya Peter, James enggau John nyukung Iya lebuh Iya besampi. Tang sida tiga iya enda ulih nyukung Iya ba maya Iya amat-amat begunaka sukung. Taja pen tiga kali Jesus minta ngambika sida bejaga, tang sida tiga lalu tinduk. Bakanya mega, Jesus udah ngangauka tiap iku kitai nitihka Iya. Tiap iku kitai bisi mangkuk kediri empu ti enda tau enda diirup kitai. Kadang-kadang kitai ngasaika ma ti dima kitai chukup berat. Lebuh ma nya kelalu berat, kitai asai ke deka ngelengkaka ma nya. Awakka kitai bulih pengering lebuh kitai belematika sampi Jesus ba Kebun Getsemani ti munyi tu: "tang ukai nitihka peneka Aku, tang nitihka peneka Nuan." (Injil Mark 14:36). Awakka kitai sedia nyerahka diri nitihka peneka Allah Taala sereta seruran tetap ba Iya.

KEREJA

Bisi kini 'mangkuk' ti berat ti diasuh Allah Taala irup nuan? Baka ni chara nuan nyaut Iya? Nama utai ti ngasuh nuan tetegu ati lalu besampi munyi tu: "tang ukai nitihka peneka Aku, tang nitihka peneka Nuan"?

SAMPI

Apai ti pemadu kasih, kami ingatka Jesus ti pemadu iya tusah ati sereta besampi enggau bebendar ba Kebun Getsemani laban ke nitihka peneka Nuan. Keringka kaki kami ti lemi lalu beri kami ati ti keran deka ngerinduka ati Nuan. Awakka kami terus mancharka penerang Nuan dalam pemetang dunya tu datai ngagai maya semua orang ngelala Jesus, ti alai kami manggaika sampi tu. Amin.

12 APRIL 2022 - JESUS DIBECHARA

BACHA: MARK 14:53-65

PERAGAM

Lebuh orang nibar kitai enggau jaku tuduh, kitai deka ngetanka diri baka mensia bukai. Kitai deka mantaika kebuah kitai nya enda salah. Tang Jesus enggai nyaut semua jaku tuduh maya Iya dibechara. Semina lebh imam besai, Kaiapas (Matthew 26: 57, 63 - 64) nanya sekalika Iya nya Kristus, Anak Allah Taala, baru Jesus muka mulut lalu nyaut madahka nya amat. Ba Kaiapas, saut Jesus nya jaku busung, penyalah ti patut diukum mati, lalu tu pemutus ti diletak balai bechara orang Judah ngagai Jesus. Laban ti bejaku bendar, Jesus diperinsa apin Iya ti diserah ngagai pemerintah Rome (Mark 14: 65). Jesus mayar unguks ti besai tegal ti beterus terang. Baka ni kitai? Lebh kitai ba endur ti begunaka kitai bediri ari sepiak pemendar, nama pemutus kitai? Sekalika kitai enggau jampat ngetanka diri ketegal nyaga nama manah diri, tang deka diau diri lebh ditanya ngetanka nama enggau mulia Allah Taala? Tauka kitai baka Peter seduai John (SPKR 4:1-22), ti berani besaksi pasal Jesus taja pen seduai ba endur tauka ba pengawa ti tau ngemediska seduai.

KEREJA

Belamatika pengidup Peter. Maya Jesus dibechara, Peter nyangkal Iya tiga kali. Tang udah Jesus angkat ke serega, iya berani sereta teperansang besaksika Jesus. Nama utai ti tau ngasuh iya berubah enggau nyata? Nama utai ti tau ngasuh nuan teperansang baka Peter besaksi pasal Jesus?

SAMPI

Jesus Tuhan kami, Nuan tetap ngamatka kangau Nuan ti nyadi Penebus maya Nuan dibechara. Saup kami ngiar ke tisi semua utai ti berat ti nating kami sereta enggau dosa ti malut kami. Awakka mata kami ditumpu ngagai Nuan lebh kami belanda enggau pengeliat ati lalu ulih nembuka lumba ti udah ditaga Nuan ke kami. Dalam nama Nuan aku besampi. Amin.

13 APRIL 2022 - JESUS DIBAI NGAGAI PILATE

BACHA: MARK 15:1–15

PERAGAM

Lebuh bala tuai pengarap mai Jesus ngagai iya, Pilate enda puas ati ke dawa sida ti bebau politik. Iya bisi ngasaika dawa sida tu bepun ari sida ti kepapaska pengawa Jesus. Tang taja pia, Pilate nundukka diri ngagai peneka sida. Bala tuai pengarap nyakap Pilate lalu madahka iya ukai pangan Raja Besai enti iya ngelepaska Jesus (John 19:12); Pilate nimbang pengawa iya ari segi politik lalu iya ngasaika tu tau mai penyai ngagai iya enti Jesus dilepaska. Bala orang mayuh ti udah ninga jaku tuai imam lalu manjung, “Regang iya” (Mark 15:13-14). Pilate ngalahka diri lalu ngereja pengawa nitihka peminta bala tuai adat enggau orang mayuh: iya nya ngeregang Jesus lalu ngelepaska Barabas (ayat 15). Pengawa Pilate tu siti chunto orang ti amuka pangkat, nama enggau kuasa, taja pen iya nemu ngeregang Jesus ti nadai penyalah nya pengawa ti salah. Pengawa enggau pemutus runding Pilate tu balat ngeruga runding iya. Ulah iya tu ngayanka senang bendar kitai nunduk ngagai peminta bala pangan, orang mayuh enggau tempat alai gawa. Nyamai amat kitai ngaga pengawa ti ditemu kitai salah ari segi moral, tauka enda engkeretik lebuh kitai nemu bisi utai ti enda betul semak kitai. Kati kitai deka “compromise” ba utai ti betul laban nya tau ngerusak pangkat enggau nama kitai? Nya alai, kitai patut nyadi orang ti berani sereta enda nangi bejakuka utai ti bendar, lalu bejaku ngarika orang ti nadai ulih mansutka penemu diri sereta ditekan.

KEREJA

Kati kala nuan ngasaika diri ngetanka pangkat enggau status lalu enggai bejakuka utai ti bendar? Enti kala baka nya, tu mih maya nuan tau minta pengampun ari Allah Taala.

SAMPI

Allah Taala ti pemadu bekuasa, beri mih aku pemerani ati ngambika aku ti udah dilepaska ulih pemendar Nuan, seruran bejakuka pemendar. Anang ngasuh aku nangi ngerara pengawa ti salah, tang berani napi pemerinsa ketegal pemendar. Di dalam nama Jesus aku besampi. Amin

**14 APRIL 2022 (“MAUNDY THURSDAY”)
- PEMESAI PENGASIH JESUS -**

BACHA: MARK 15:16–24

PERAGAM

Regang ti disan Jesus nuju Golgota nya berat bendar, nya alai Simon ari Sairin diasuh nulung Iya (Mark 15:21). Pengawa tu ngubah pengidup Simon. Iya nya siku orang bansa Judah ti datai ari Africa Utara. Iya engka baru datai di Jerusalem ngulu Gawai Paska. Iya apai Aleksander enggau Rupus. Seduai tu dipelabaka dikelala bala pemacha Injil Mark di Rome laban nama seduai bisi disebut dalam Injil nya. Nambahka nya, Paul mega bisi nyebut pasal Rupus enggau indai iya, ti nyau baka siku indai ngagai Paul empu (Rome 16:13). Enti nya Rupus ti sama, tu nunjukka Simon nya nyadi murid Jesus udah iya ngesan regang Iya. Tu ditangkan ke ruang bilik iya ti sama arap lalu nyadi murid Jesus. Taja pengawa iya ti nulung Jesus nya pengawa ti mit, tang pengawa nya ngubah ruang bilik iya, lalu tu mega ngujungka sida diberi Allah Taala tanggung pengawa ti lebih besai udah nya. Selalu iya kitai mikir, kitai semina ulih mela Allah Taala enti kitai udah chukup disikap tauka udah chukup tuai dalam Kristus. Tang Allah Taala ngiga orang ke taluk sereta ngasi. Saut “au” kitai keterubah ke pengawa ti mit tau ngubah kitai nyadi sebaka enggau Jesus lalu deka muka peluang ti lebih besai dikena kitai mela Tuhan. Kati kitai sanggup ngasi lalu mela Tuhan, taja pen pengawa nya baka ke mit?

KEREJA

Kati nuan bisi pangan ti begunaka bantu ti diasuh Tuhan dibantu nuan seharitu? Besampi ngambika nuan bisi pengering enggau pengasih ngereja pengawa nya.

SAMPI

Allah Taala ti pemadu bekuasa, terima kasih ke peransang ari Simon orang Sairin, ti ngesan regang ti berat ke Jesus. Beri aku pengasih enggau pengering ngambika aku tau tepeda, ngelala utai ti ngeribat orang bukai, lalu sanggup besaup enggau sida nyan pengeribat pangan diri, ngambika kami seruran taluk sereta ngasika Nuan. Dalam nama Jesus aku besampi. Amin.

**15 APRIL 2022 ("GOOD FRIDAY")
- JESUS DIREGANG -**

BACHA: MARK 15:25-39

PERAGAM

Ngeregang mensia idup-idup nya chara munuh orang ti amat kasar, ti digaga bansa Rome, dikena ngukum ulun enggau orang ti ngelaban perintah sida. Pengawa ngeregang tu engka suah dipeda mensia mayuh ba kurun ke keterubah kelia laban orang ti diregang nya nyau beribu-ribu pemayuh. Bala murid Jesus mesti tekenyit ati lebuh Jesus ngasuh sida ngesan regang diri lalu nitihka Iya. Kelimpah ari ngenakutka, pengawa ngeregang nya utai ti amat salah ba runding orang Judah. Nitihka Ulang Adat 21:23, orang ti diukum mati di atas kayu nya orang ti kena tinggang sumpah Allah Taala. Nambahka nya, mati begantung telanjai atas kayu regang nya dianggap siti pemalu besai dipeda mata orang mayuh. Nya alai enda iran kitai enti orang mayuh ngeleseka Jesus lebuh Iya mati di kayu regang. Bala tuai pengarap ti mansa Jesus enggau siku penchuri ti diregang sepiak Jesus mega sama bela bejaku ngeleseka Iya (Mark 15:29-32). Sapa ti deka arapka Iya ti diregang nya Anak Tunggal Allah Taala, baka ti nadai daya enggau nadai kuasa matika dosa dunya? Taja pia, bisi orang siku ti enda disangka ti sama bisi enggau besaksika pengawa ti ngelese enggau merinsaka Jesus. Iya nya siku pemesai soldadu Bansa Bukai ti bisi ba pun kayu regang dia, ti ulih nyagam kelai ti besai lalu nyapa munyi tu, "Tentu Orang Tu Anak Allah Taala." (Mark 15:39). Orang Bansa Bukai tu udah tetemuka Juruselamat dalam Jesus.

KEREJA

Nama utai ti deka dikereja nuan ngambika pengidup nuan nya tanda Jesus udah nyadi Tuhan enggau Juruselamat nuan?

SAMPI

Allah Taala ti pepadu bekuasa, aku ngingatka pemedis Jesus ti udah nyerahka nyawa diri mati merinsa di kayu regang. Tulung aku nitihka teladan pamaruh pendiaul Iya ti udah ngasika Nuan, ngambika aku ulih besangkalka diri empu, ngesan regang lalu nitihka Iya ninting hari. Dalam nama Jesus aku besampi. Amin.

16 APRIL 2022 - JESUS DIKUBUR

BACHA: MARK 15:42–47

PERAGAM

Dua iku murid Jesus datai deka minta bangkai Iya ari Pilate laban deka nguburka Iya. Siku ari seduai ti benama Josep nya orang ari Arimatea. Iya nya murid Tuhan Jesus chara belalai laban takutka orang Judah. Iya nyukung belalai dataika maya Jesus dipechara. Iya siku ari bala ti mantah penemu ti deka ngeregang Jesus. Taja pen iya enda oleh mujuk tuai Adat ngelepaska Jesus, iya endang deka nentuka Jesus dikubur enggau chara ti menyana sebedau Hari Sabat, enggaika Iya ditinggalka ba kayu regang tauka dibuai sama enggau orang jai lalu bangkai Iya dipakai ukui. Enggau ati ti berani Josep minta bangkai Jesus, lalu ketegal nya iya ngayanka diri orang ti taluk nitihka Jesus. Tu ulah ti amat berani. Siku agi murid Jesus ti datai enggau Josep nya Nikodemus. Iya pen siku ari murid Jesus chara belalai. Nikodemus nyediaka lebih kurang 35 kg rempah ti mar rega dikena nguburka Jesus. Rempah ti disediaka tu chukup mayuh, nyau sama pelayuh enggau rempah ti dikena ngintu pemat i raja tauka orang ke dipebasa. Kebuah pia laban Nikodemus endang arapka Jesus nya Raja lalu patut dikuburka enggau chara ti naka pemanah. Ba maya ke baka tu, Josep enggau Nikodemus sanggup ngayankan pengarang seduai ba Jesus lalu enda agi nyadi murid ti belalai. Seduai iya sanggup dibuai oleh tuai Adat enggau bansa Judah. Taja baka nya, bala murid Jesus ti begulai tiga taun nitihka Iya nadai temu tunga maya nya. Ulah sida bebida bendar enggau ulah Josep seduai Nikodemus! Semua kitai patut nunda Josep enggau Nikodemus ti sanggup nyadi saksi Jesus ti taluk.

KEREJA

Kati ulah kitai baka murid Jesus ti belalai laban kitai takut ngaku pengarang kitai ba mua orang mayuh? Nama utai ti nagang kitai ari ngaku penaluk kitai ngagai Jesus ngagai bala dalam ruang bilik diri empu, bala kaban belayan, pangan, orang ti sama enggau bekereja, enggau orang ti berimbau enggau kitai.

SAMPI

Apai ti pemadu bekuasa, ampun kami lebu kami takut tauka malu ditemu orang nyadi murid Jesus. Beri kami pemerani besaksika Jesus nengah jaku enggau kereja kami, ngambika kami seruran ngemuliaka Nuan. Dalam nama Jesus Kristus ti Tuhan kami. Amin.

17 APRIL 2022 (HARI ISTA)
- JESUS ANGKAT ARI MATI ENGGAU NIKI KE SEREGA -

BACHA: MARK 16:1-8, 19

PERAGAM

Chara Mark nulis pasal pengangkat Jesus ari mati balat ngalitka runding orang mayuh. Mark nyeritaka pasal bala indu ti datai ngagai kubur Jesus laban deka ngunsut bangkai Iya enggau rempah. Tang “sida pansut lalu rari ari kubur, laban sida balat takut sereta balat alit ati, lalu sida nadai madahka utai nya ngagai orang, laban sida takut.” Chara Mark nulis tu baka ke enda patut, lebih agi lebuah iya nulis bap ke penudi. Chara Mark nulis tu dikumbai “command of silence.” Ambi ke chunto, Mark selalu nulis pasal Jesus ti enda ngemendarka orang nusui pasal sapa Iya tauka pasal kereja ajih ti dikereja Iya. Jesus nemu orang mayuh deka mejal Iya nyadi raja sida. Tang peneka sida tu betentang enggau tuju tauka misyen Jesus di dunya tu. Ketegal nya, Iya nagang orang mayuh nusui pasal sapa Iya, dataika Iya udah angkat ari mati. Tang udah Jesus angkat ari mati, sida diasuh meritaka Injil. Tang Mark nadai madah sekalika udah nya, bala indu nya tadi ulih ngalahka penakut sida lalu nyerita ngagai orang mayuh pasal pengangkat Jesus. Ketegal nya orang mayuh alit ati lalu agi nanya sekalika bala indu nya bisi nusui berita pasal penangkat Jesus ngagai orang bukai. Mark engka sengaja nulis Injil baka nya, ngambika lebuah kitai macha cherita pasal penunga indu ti rari ari kubur, kitai tau nanya diri empu; iya nya sekalika kitai bisi nyeritaka pasal Jesus ngagai orang bukai, pasal pematI enggau pengangkat Iya, enggau pasal Iya ti deka datai baru.

KEREJA

Sebedau Jesus niki ke serega, Iya ngasuh murid Iya nyeritaka Injil ngagai seluruh dunya. Kati jalai nuan ngasika pesan Jesus ti ngasuh nuan mupuk bejalai lalu ngaga semua bansa nyadi murid Iya?

SAMPI

Tuhan ti meruan, Anak Nuan Jesus Kristus udah angkat ari mati lalu niki ke serega lalu diatu duduk muak ari kanan Nuan; berika kami pengering enggau pemerani mupuk bejalai lalu ngaga semua bansa nyadi murid Jesus. Awakka kami madahka Iya nya Juruselamat dunya ngambika orang datai deka ngelala Iya lalu nyembah ba baruh kaki Iya. Dalam nama Iya aku besampi. Amin.

BALA PENGARANG

HARI BULAN	HARI	PENGARANG	
2-Mar-22	Hari Tiga Abus	Revd. Rodriguez Unak Charles	
3-Mar-22		Revd. Wity Kendu	
4-Mar-22		Revd. Kelvin Jawa	
5-Mar-22	Hari Minggu Keterubah Musin Lent	Revd. Timon Lugi	
6-Mar-22		Revd. Canon Roannie W Cannidy	
7-Mar-22		Revd. David Tan Kok Kui	
8-Mar-22		Revd. Robin Sabai	
9-Mar-22		Revd. Stephen Gendang	
10-Mar-22		Revd. Augustine Saidi	
11-Mar-22		Revd. Stanley Kiew	
12-Mar-22	Hari Minggu Kedua Musin Lent	Revd. Wilston Trin	
13-Mar-22		Revd. Canon Dennis Gimang	
14-Mar-22		Revd. Francis Nyegang Ambrose	
15-Mar-22		Revd. Moses Jakir	
16-Mar-22		Revd. Villy Velin	
17-Mar-22		Revd. Ramdan Mejem	
18-Mar-22		Revd. James Juhari	
19-Mar-22	Hari Minggu Ketiga Musin Lent	SD John Chundi	
20-Mar-22		Revd. Canon Alfred Damu Bulang	
21-Mar-22		Ven. Stanley Bunseng	
22-Mar-22		Revd. Hold Jin Ahit	
23-Mar-22		Revd. Christopher Ajis	
24-Mar-22		Revd. Trevor Tinda	
25-Mar-22		Revd. Kebin Suur	
26-Mar-22		Revd. Joseph Dusit Ijau	
27-Mar-22		Hari Minggu Keempat Musin Lent	Rt. Revd. Nelson Ugas Bulang
28-Mar-22			Revd. Eliot Ejau Jayan
29-Mar-22			Revd. John Ugil
30-Mar-22	Revd. Tony Jilat George		
31-Mar-22	Revd. Elebis Tan Entry		

HARI BULAN	HARI	PENGARANG
1-Apr-22		Revd. Kamor Diah
2-Apr-22		Revd. Ralpheal Rueben Bonnie
3-Apr-22	Hari Minggu Kelima Musin Lent	Rt. Revd. Datuk Danald Jute
4-Apr-22		Ven. Jose Jol Endru
5-Apr-22		Revd. Jecksion Tay
6-Apr-22		Revd. Philip Tauk
7-Apr-22		Revd. Johnny Janggok
8-Apr-22		Revd. Walter MacDaniel Nakan
9-Apr-22		Revd. Kanyan Randi
10-Apr-22	Hari Minggu Daun	Revd. Dr. Lim Kar Yong (Disalin SD John Kennedy Janang)
11-Apr-22		Revd. Dr. Lim Kar Yong (Disalin SD Chundang Jegang)
12-Apr-22		Revd. Dr. Lim Kar Yong (Disalin SD John Kennedy Janang)
13-Apr-22		Revd. Dr. Lim Kar Yong (Disalin SD Klimbang Tangkun)
14-Apr-22	“Maundy Thursday”	Revd. Dr. Lim Kar Yong (Disalin SD Davis Jeram)
15-Apr-22	“Good Friday”	Revd. Dr. Lim Kar Yong (Disalin Mr. Stewart Greene Gendang)
16-Apr-22		Revd. Dr. Lim Kar Yong (Disalin SD Gandau Naga)
17-Apr-22	Hari Ista	Revd. Dr. Lim Kar Yong (Disalin SD John Kennedy Janang)